


KA SYN RAP—I

**KHYLLIE PAT PARARI**  
**la La Ka Khaï Pateng**

△ △ △

**KRIESHON RAPTHAP**



**Spah Jong Ka Ri La Kit Kiwei,**  
**Ban Longtrai Biang, Pyndier Ngim Del.**

**1978**



# **KHYLLIE PAT PARARI**

## **la La Ka Khaï Pateng**

△ △ △

**KRIESHON RAPTHAP, B. COM.**

---

*La pynmih da U*

**ELDON RAPTHAP**

*La Pynphriang da U*

**DEBIN KHARSYNTIEW.**

---

**Spah Jong Ka Ri La Kit Kiwei,  
Ban Longtraï Biang, Pyndier Ngim Del.**

**1978**



*State Central Library  
Meghalaya, Shillong.*

**REFERENCE**  
*Not to be Lent out*

KANE KA KOT KA LONG BAN PYNSAH  
JINGKYNMAW IA I PA JONG NGI

**U Ksan Jyrwa**

IBA LONG SIRDAR KA HIMA NONGLWAI  
NADUH 1911 HADUH 1946 BAD I LA  
KHLAD NOH HA KA  
25 TARIK NAITUNG 1946 HABA I LA DAP  
75 SNEM KA RTA


KA LYNTI JINGIM JONG I KA IAI-AI BOR  
AI MYNSIEM BA NGIN NANG IAKSAID NA  
KA BYNTA LA KA RI.

*Library books will give you Joy for Long  
If handled carefully & with clean hands*



## Ka Jingkdew

Lynnong	Page
I. Ka Dustur iohpateng ... ..	1
II. Ka kamai ba tang shikhmat ... ..	6
III. Ka khai pateng ... ..	10
IV. Ka khai pateng ha Shillong ... ..	16
V. Ka jingiar bad ka lad ban longtra biang halor ka khai pateng ..	21
VI. Ka jingtrei Karkhana ... ..	29
VII. Ka rep ka riang ... ..	36
Ka jingthoh Tam (Appendix)	
Ka jingroi parum pareh ki Khun U Hynñlew Trep	41







## Ka Shyngkub

Shinajar nguh ia ki para-ri ba ki la iathied paidbah ia ka kot, "La shalong Ki Khasi Ngaiñ," kaba long ka jing-pyrshang banyngkong jong nga. Ka jingñiewkor ki paradoh parashnam ia ka, ka la pynshlur bad al mynsiem shibun; bad ka la pynlah ruh ia nga ban sei madan sa kane kawei de.

Kumba ki wah rit ki bsa ia ka wah bah, ki thiedd'ong ki kyrshan ia u dieng bah, ki shalyntem ki pynald'ia ka kali bad ki shijur ki thapniang ki pynher la ka sim; kumta ruh keiñ, ka khai pateng bad ka khih ka khan ba roi kyrhai ki pynlong la ka ri bad ka jaitbynriew ka badap babiang, ka bakhrav bor khraw tyrpeng bad ka ba-lphuh iphieng.

Ha ki sngi mynba ka i ka dang khara, ki Longshuwa Manshuwa jong ngi klm shym duna ei el ruh ha kane ka liang. Ka khanapateng bad ki kot ki sla ki lathuh ia ngi, ba ki Khasi hyndai ki la ju shalan la ki mar nar bad kiwei pat ki jingmih na ka ri shaduh ki pyntha jong ka Surma bad ki them jong ka Brahma bad ki la pynpoi ruh la u Sohñlamtra shaduh ri Syria bad Europe. Hynrei mynta pat tyngkreiñ ngi lohi da la ki khmat, ba ka khai pateng ki khun ka ri ka don hapdeng ka jingkhiedew bad jing atphyllung bad lynda ngi kyndit briew noh, ka lah ban kylla lieng noh syndon tang hapoh kane hi ka pateng.

Na ki jait kam baroh, dei ka khai pateng bad kiwei de ki kam lajong kiba don ka jingiadei bajan tam bad ka rukom hiarpateng ka spah ka phew bad ka nongtymmen nongsan Kumta haba nga la peit la ki dak ki shin, la ka liem ka lup bad bishar ruh la ka kam ka lar, nga lohi la la ka jaitbynriew ha kane ka pateng ba ka tlot ka swai bad ka hiar shibun haba ianujor bad kiwei pat ki jaitbynriew. Ha bun ki khap ka jingiakhun ha ka khih ka khan (business competition) ka paw shai ba ki jong ngi ki shu long tang kumba *upynach Saich Patko*.

Ha kane ka kynti nga la pyrshang ban tih ban khlong bad ban wad ia ki daw kiba la pyntroiñ bad pynkhrew la ka khaí pateng bad ka khhí ka khañ jong ki parakher paramer, ryngkat ruh bad ki lad ki lynti kiban pynkhie im pat la ka nam khaí pateng u Khasi hyndai.

Ha kane ka phang, ka Sorkar India mynta ka laleh ban kyntlew bad rah ia ka loh ka kot jong ngi ki Riewlum bad kiwei de ki ritpaid (Scheduled Tribes and Scheduled Castes) sha ka kyrdan kaban iaryngkat bad ki hehpaid.

Nga kitram shibun eh na ki paralok parajor—kynthei bad shynrang. kiba la ia-ai built ai bor bad pynshlur ia nga ha kaba pynkhreh ia kane ka kot.

Nga da sngewnguh bad sngewburom shikatdei eh ia i Dr. R.S. Lyngdoh, M.A., Ph D., iba long u Rang-kynih ka thoh ka tar Khasi, ia i Bah B.C. Jyrwa, B.A., uwei na ki rangphawar ha ka thoh kot Khasi bad ia i Fr. S. Sngi Sten Lyngdoh, S.D.B., uba ngi ñiew kum uwei na ki rangieit-ri jong kane ka pateng ; kiba, wat hapdeng ka jingbun kam, ki la kloí ban pyllait por ha kaba pule, pynbeit bad ai jingmut shuh shuh ban pynwandur ia kane ka kot kumba ka long.

Ka lyngkha ka baiar, ka jingtrei ka shitom bad ka por ka lyngkot. Ka jingkyrsiew, te namarkata, ka long ba ki khun ka ri kin ieng rangbah noh joit, kin kut jingmut skhem triang bad kin iajeh tynggeh noh ruh ban pynkhie biang ia ka rasong kum mynbarim bajah.

Lumkshaid, Lower Mawprem

Shillong-2.

20 tarik U Kyllalyngkot 1979.

Krieshon Rapthap.





Phone No.

Off : 6978

4201

(Res : 401)

Doc : 4351

**Dr. R.S. LYNDOH**

*Chairman*

**Meghalaya Pay Commission**

*Dated 15th. January 1979*

"Khyllie pat Parari ia la ka Khaī Pateng" ka long sa kawei pat ka phang ia kaba u Bah Krieshon Raptap u pyrshang ban bsuh ha ka dohnud jong ki parari. U nongthoh um dawa ba u dei u economist ne u Social Scientist. Dei namarkata ka daw ba ka rukom thir rukom thaiñ jong u ia ka Sengnia kam long ha ka dur ba la ruid phang da ki Economist ne da ki Social Scientist. Hynrei u nongthoh u ringksai ia ka rukom pyrkhat jong u kat kum ba u lohi bad u shem. U la pyrshang ban shat ban kheñ bin pa bin. hynrei don ki bynta ba ka shat ka kup bad don ruh ki bynta ba u nongshat u don ha ka lyngngoh. To ynnai ia kata baroh. Ki jingshem jong u nongthoh ki biang ban pynpeltmat ia ki khmat ba la byrie, ki biang ruh ban pynproh ia ki jablong ba la bthi, bad ki biang ruh ban pynkyndeh shadem ia ki samla kiba thmu ban laid shaphrang ban pynriewspah ia la ka jaidbynrlew ha ka liang ka Spah ka phew, ka akor ka burom ka tip-kur, tip kha, ka tip-hok tip-sot bad ka tip-hrlew tip Blei.

Nga kyntu ia ki parari baroh ba kin lmsngi ban burom ia la ki nongthoh. Nga kyntu ruh ia u Bah Krieshon Raptap ba un nang laid shaphrang ha ka ban lai shakfi ia la ka Ri bad ka jaidbynrlew.

**R. S. Lyngdoh.**



## "BAN KRANG IA KI MAWHIRA DONKAM BUN SNGI BUN IA."

Ka Phew ka Spah ne na ka Spah sha ka phewspah? Kael ka daw? Hato ka spah ka hiar pateng ne ka dei ban kiew pateng? Hato ka daw ka long namar ba ki Khun Shynrang kim kwah ne kim mon ban iasynran ia ki Kmie ki Kpa, kiba don la ka Khai ka pateng ne ka khih ka khan ne ka kam ka duk? Ne ki Kmie ki Kpa kim pynthikna ia ka jingai bhah ia ki khun Shynrang kat hadun ba kin da sngew nongwei ia la ka kam. Imat kine baroh ki long kiba ngi dei ban hap pynbeit thymmai, la da ngi kwah ba ka spah pateng kan kiew bad ba kan nym sah tang shikhmat pateng. Ngia dei kum ki Kmie ki Kpa ban shong khan pyrkhath kham sani ia kane ka phang, ba ka jingsam bhah ia ka khyndew ka shylap, ka spah ka hajar bad ia ki ing ki sem dei ban da thew da woh, ban da mang bha na ka bynta ki khun Shynrang bad Kynthei. Da kaba ong kumne, ngam mut ban pynshong Sator ia ki Mawkhram ka Riti ne ka Duster u Ni u Kong, hynrei ngin hap ban peit ia ki jingkylla jong ki por; kiba ka jingialeh ki khun Shynrang mynta ka long ban ia ai reng bad kiwei pat ki jaitbynriew, ha ka khih ka khan, ka khai ka pateng bad ki kam ki jam, kaba ki khun kynthei bapli kim kotbor kotsor ne kot khan kotluh ban leh ia kata.

Kumta.haba kane ka kot, 'Khyllie pat Parari ia la ka Khai Pateng', ka wan paw pyrthei, da u juh u nongthoh "La Shalong ki Khasi Ngain." kam aithiah aidem shuh, khamlam ban johi ba ka jingwan kyrthep kiwei pat kiba nabar ka la jyllei katta katta. Toi, kane ka jingpyrkhat kala dei ban kha la kham mynshwa, tangba kam pat dap bnai pura bha imat. Mynta te ym lah ban ong da kumwei pat lait satang ban ong ba kala ih bha.

Kane ka long shisha ka por, kaba pynkyndeh shadem ia ngi kum ka jaitbynriew, ba haba ngi poi ha une

u pud, ngi shlei da ka jngkmen ban iohi ba une u Samla hadien ba u la jngi lapop ha kane ka jingshah, tyllap ula sei lyngba ka jingia-ksaid tyngah jong u Kumba u Symbai u Sei ia ia ki soh, u Nongtrei u loh lala ka bam, u ba minot bad uba iaksaid un poi sha ka thong ha kawei ka Sngi. Ka jingiohi ba maian jong une u Samla iala ki parari ha kane ka bynta ka long kaba shisha. Kane kam thew tang ha ki jylli jong ka lewduh hynrei ka par wat sha ki bynta ka Khyndai Lad, Laitumkhras Lahan, Mawprem bad kiwei ki bynta jong ka Sor Shillong Nalor kata, kaba pynitieng ia ngi mynta ka long ba wat sha ki lew bad ki Hat ba don sha Nongkyndong ruh une u jawleh raid u la sdang ban pur ban kiew shynrong, kiba long da shisha ka jingma kaba khras ia ka Ri u Hynñiew Trep shi tyllap.

Hooi, ki jingpynwit bad ki jingtynjah ha ka jingim ki long ki teiñthap ba pynbtiar syllang bad pynbitar ia ngi ba ngim dei ban shoh samthiah sah. khlem da khmied ia ki khmat ban iaksaid ban lait im. U Mawpun ba shisha jong ngi u long ba ngi dei ban kyrsong ban poi sha ka thong kumba la mait phang da une u Samla, U Krieshon Rapthap Namar ka jingkhraw ba shisha kano kano ka jaitbynñiew, la ñiew na ki kam ratbah kiba ki leh, ym tang na ki ktien ba ki kren. Ka jingim jong ka jaitbynñiew mynta ne lawei ka shong ha ka dor kaba ngi siew ha ka mynta.

Ki Hynñiew para kiba une u Samla ula pynieng ia ka nongrim jong kane ka thup kaba Ar, ka shat kum ki Hynñiew rong u Siempyilleng, ki ban plie thymmai ia ka pyrkhath ka pyrdaiñ ba don sap kane ka pateng, ban kynrup ia ki lad khai pateng da lade hi.

U da maham tyngah ruh ia ki khun Samla Shynrang bad Kynthei ba kin kham pyrkhath khia ia ka jingtrei kaba ki Kmle ki kpa kiba Seng ba kan nym hiar arsut, hynrei ba kan nang kiew artet katba nang mih ki sngi. Hato ka rukom hiar pateng ka fong ka daw? Hangne u buh

ruh ia ka jingkit khlieh ba laryngkat, kaba ngi dei ban da pynshong nia bha. Ula Sei wat ia ki nuksa kiba na kyllong ka' pyrthei ban ai mynsiem ia ngi ba ka long ka jingkhoi kaba mardor katta katta, kum ka Kynpien ban ia aireng bad kano kano ka jingeh kaba ngi ia-kynduh.

To ngin ia kham bishar ban wad ia ka ka daw, ka kem ka lar, nangno' ka lait nangno ka let, shuwa ba ngin pynshongnia ne pynkut nia. Ngì don la ki daw ing ba ngi dei ban da tai krai bha, khnang ba kaei kaba wit kaba khanglad ia ka jingiaid shaphrang ha ka kamai kajih ka khih ka kham ki khun kanə ka pateng.

Nga doh ka jingkyrmen ka bashynna bha ba kane ka thup ka don ka khubor kaba kyrpang ia ka jaitbynriew jong ngi, ha kane ka pateng bynriew ba mynta, bad nangne nga ngeit kan kyrsiew ha kawel pat ka step ym shuh kaba shu shai byrngut, hynrei kaba phyrnai bha khrek. Imat ka ia ka la ih bha ba ngi dei ban iathiah man ka mied bad khie man ka step bad kane ka jing-pyrkhat.

Nga dang angnud ban iohi shuh shuh sa kiwei pat ki thup na ki thiar une u Samla, katba nangmih ki Sngi. Nga ngeit ba u dangtyngkai sa kiwei ruh kiba um pat pynphong pynkup ne ohshrong ohshrup.

**Dt. Mawlai Iewrynghep,**  
Shillong — 8.  
U Nohprah, 20tarik 1978

**B. Chedrack Jyrwa,**  
Department of Khasi  
Shillong College, Shillong.



*Eah Krieshon bareit,*

Nga la pule ia ka kot ba phi la thoh ha kine ki bnai. Nga la shem ba ka long ka babang haduh katta-katta ba ngam banse ban pule ar-sien bad lada ka por ka shah, ngan sa pule sa shisien ruh. Ka jingbang jong kane ka kot ka ba-ar kaba la mih na u khulom-ksiar khulom-rupa jong phi kam shong tang ha ki kyntien ne ki rukom thoh, hynrei khamtam eh ha ka jingmut bad ka mynsiem, ha ka jingñiewkor ia la ka ri bad ka jingieit ia la ka jaitbynriew. Kine krei-kiei ki paw shisyndon, ngi tang shu peit ia ka sla ka banyngkong ha kaba ngi iohi la kine ki kyntien:

**KHYLLIE PAT PARA-RI  
IA LA KA KHAII-PATENG:**

bad kine kiwei pat

**SPAH JONG KA RI LA KIT KIWEI.  
BAN LONGTRAI BIANG, PYNDIER NGIM DEI!**

Ha kane ka kot phi la ktah ia kaei-kaei kaba ki Hynñiew-Trep ki da donkam eh haduh katta-katta. Lah ban ong ba phi la ktah ia u klong snam jong ka jaitbynriew jong ngi. Baroh ki riwstad ki mynjour ba ka jinglm ne ka jingiap jong ka jaitbynriew ka shong ha ka "IOH-KA-KOT (ECONOMY)." Bad ka loh-ka-kot kan ym wan khlem ka khai-ka-pateng. Na kane ka daw, ngam artatien ei-ei ba ki paidbah kin thied bad kin pule ia kane ka kot jong phi.

Shuwa ban pyngkut, nga sngew ba nga dei ban kyn thoh sa khyndiat shaphang ka Jingthoh-tam jong phi. Kane ka phang kaba phi la pynmih ha kane ka jingtnoh-tam kam dei tang u klongsnam, hynrei nga lah ban ong ba ka dei "KA MYNSIEM". Nga hi nga ong ba la kane ka jingthoh tam ki samla shynrang bad kynthei jong ngi ki dei ban spel lyndet lut baroh khoit.

**Khublei shibun eh. Iald shaphrang bad pynmih  
shuh-shuh ki kot kiba kum kine kata, ki kot ki ban kyr  
siew ia ka jaitbynriew ba la jan ionthiah jong ngi.**

**U Blei un kyrkhu ia phi.**

**Uba burom bad niewkor,**

**Fr. S. Sngi Sten-Lyngdoh, SDB**

**25-11-1978.**

**Editor ka Sur Shipara.**

—



## KA DUSTUR IOH-PATENG

Ka jingthmu bad jingkwah jong ki longkmie longkpa ka long ba. nator ka kamai bam-rwing, ka dei ruh ban kamai shitom katba dang eh dang khlaifñ ban dup ioh kynshew na ka bynta ka jingim lajong bad ruh na ka bynta ka law i jong ki khun ki ksiew Lada don lad lei lei, ki kmie ki kpa ki da kwah bad thrang eh ba kin ai ka seng ka dang ia la ki khun ki kti; bad katno ki sngewbha bad sngewphuhmat ban iohi ia la ki khun ki ksiew ba ki in ha ka dap ka biang bad ka pahuh pñhal. Kumta haba kren kyllum, u kpa um kamai tang na ka bynta la lade shimet bad shikhmat, hynrei u kwah ruh ba ki khun ki ksiew kin iohpateng ia ka kamai jong u ynda um don shuh ha kane ka pyrthei. Kumta ka jinghiar bad jingioh-pateng ia ka kamai kajih, ka spah ka phew, ka kam ka jam bad ka jingdon jingem ka hiar na kawei ka pateng sha kawei pat.

Kumba ka long ha kiwei kiwei ki jaitbynriew, kumta ruh, ngi ki Khasi ngi don la ka jong ka rukom jingpynbeit ia ka jinghiar-pateng bad jingioh-pateng ia ka kamai kajih, ka spah ka phew bad ka kam ka jam.

Ha ki Khasi ka jingiohpateng ia ka spah ka phew bad ka jingdon jingem jong ki kmie ki kpa ka leit tang sha ki khun kynthai. Katba ki khun shynrang ki dang shong khyrrow, ki kamai kajih ha la iingkmie bad ka kamai jong ki ka leit sha ka kmie; hynrei ynda ki la leit iingbriew pat kim ioh bynta ne bhah ei ei na ka spah iingkmie. Haba ki khun shynrang ki la leit iingbriew ki kamai ha iinglok bad ki bsa ki btiah ia la ki khun ki kti. Ha ki thajñ Pnar pat, ki khun shynrang ki kamai hi ha la iingkmie ne iingkur wat ynda haba ki la shongkurim ruh (ia kane ka rukom ngin iapule bniah ha ka Synrap ba ar ....)

Ha ka ri Khasi-Jaiñtia, Iait noh katto katno ki jaka ha War bad Bhoi, ka dustur iohpateng ka long ba ka

spah ka phew, ka kamai kajih bad ka jingdon jingem jong ki kmie ki kpa ka hiarpateng sha ka khun khatduh. "Ha ka rukom Khasi ka nongiohpateng ia ka spah ka phew, ka iing ka sem, ka bri ka khyndew, ka 'lang khynna ka si khynna ka snap ka skor baroh katba don ka jong ka kmie u kpa bad ka nongtymmen nongsan kaba bap ha ka kmie jong ka, dei ka khun khadduh".<sup>1</sup> Baroh ki hymmen kynthei bad shynrang, kim ioh ei ei hynrei ki ioh tang ki jingdeng (ksiar ne rupa) ba la ai da ki kmie ki kpa ha ka por ba ki dang im. Lada ka khun khatduh ka iap khlem khun, ka hynmen ka barit tam ka dei ban shim ia ka jaka jong ka; hynrei lada ka ioh noh ki khunswet kiba dang rit, kano kano ka hynmen kan ri kan sumar ia ki haduh ba kin da heh bad kin da lah ban shimti ia ka iing ka sem jong ka kmie jong ki. "Lada ym don khun kyntaei, ka hiarpateng sha ki khun shynrang kiba iasam ia ka hapdeng jong ki. Hapdeng ki Synteng, ka nongkhynraw bad ka spah ka phew jong ka kmie, ynda ka iap, ka hiarpateng sha ka khun khadduh, bad, haba ym don khun kynthei, sha u khun khudduh".<sup>2</sup>

Ki kamram jong ka khun khatduh :—Nalor ba ka dei ka nongiohpateng, ka khun khatduh ka long ruh ka nongri nongsumar ia ka iing ka sem bad ka nongiarap ia ki hynmen ki para haba ki shem kano kano ka khia ka shon bad ka jynjar ka lanot. Ka dei ruh ban bsa bad sumar ia ki kmie ki kpa haba ki ia tymmen. "Kino kino kiba na ka iing kibym lah ban kamai ia lade bad kibym don khun ban bsa ia ki ki don ka hok ban ioh bam loh di ha ka iingkhadduh (members of the Family who are unable to earn for themselves and have no children to earn for them have the right of being fed at the iingkhadduh.)"<sup>3</sup> Ka hap ban kit ia ka jinglut bakham khia ia u synñlang u bynhei ha kano kano ka kam.

Lada don ka jingiasam ia ka jingiohpateng jong ka iing, dei ka khun khatduh kaba ioh ia ka bhah ka babun tam.

Ha ki katto katne ki jaka ha ri War ne Bhoi khap ri Dkhar, kum ka thain Shella kat haduh Nongjri bad ki phang Nongpoh, baroh ki khun kynthei bad shynrang ki iaioh mar ryngkat ryngkat ia ka kamai kajih jong ki kmie ki kpa. Ka rukom ha ri War ka long ba lada don ka jing-lehniam ei ei, ki hap ban iakit marbiang ia ka bailut balsep baroh shipara, kynthei bad shynrang. Kino kino kibym sei ia ka bailut ki duh noh ia la ka bynta bad ioh noh da kito kiba pynsiew ia ka ; bad lada napdeng ki shipara ym don ba lah ban pynsiew, ia kata ka bynta dei ban die noh.

Haba shu pyrkhat tang na sla khlem da ngam jylliew bad pynshongnia bha, ym sngewdei ba ka khun khatduh kan ioh ia ka iing ka sem bad ka spah ka phew jong ki kmie ki kpa; hynrei la kham sngewdei ba kan ioh ka khun nyngkong kaba la iakit iabah lem ia ka khia ka shon jong ki kmie ki kpa. Te kumno keiñ ba ki Longshuwa Man-shuwa ki buh pynban ia ka khun khatduh ban long ka nongioh ia kane ka bynta? Kumjuh kumba ha kawei ka ksing-ngap ym ju don ar klaw, kumta run ki Khasi kim ju lashong iasah lang ha kajuh ka iing (kawei ka dpel, uwei u khiew-ja) ar ngut ki kmie ba dang iakha iapun ryngkat ryngkat ; ngim ju don kata ka rukom kamai lang bam lang (joint family system); ha kaba ki khun bad la ki kmie ki kpa ki lashong iasah lang bad ki kmierad kparad ha ka juh ka iing. ki Dkhar ki la ju don kum kane ka rukom, hynrei mynta ba ki la kylla ka porthi, namer ka jingirei kam wat tang hapdeng shipara ruh ka long ha la ka jong ka jong ka jaka, kumta kim lah shuh ban iabud ban shu lashong tang ha kajuh ka iing. Te kumta lada ka khun nyngkong kan shim ia ka iing ka sem, yn don ar ngut ki kmie ki ba iadon khun kiba dang rit ha kajuh ka por, bad kane kan long ka bakynrum kynram shibun. Hynrei haba ka khun khatduh ka shimti, dei tang ka khun kaba dang kha dang pun bad ka kmie ka ioh lad ban larap pynsumar la ki khun jong ka. Imat dei na kane bad kiwel pat ki daw, kum ka jingsngewieit la ka khun khatduh da ki kmie ki kpa bad ki hynmen, ba ki Longshuwa M

sa pynskhem ia ka khun khatduh ba kan long ka nong-  
ihphateng ia ka ilng ka sem bad ka spah ka phew.

Ngi sngew ba ka long ka babha bad badei eh hi  
keiñ ba ki khun baroh, kynthei bad shynrang, kln iah  
bynta lang ia ka spah ki kmio ki kpa. Hynrei 'aba peit  
bnlah bad khangkhai bha, bad lada thew ha ka tarajur  
jong ka loh ka Kot (Economics), ngi lohi ba kane ka  
jingioh bynta lang ka long pynban ka jingpynpait-pyn-  
pra bad ka jingpynsaphret ia ka spah ka phew bad ka  
khyndew ka shyiap. Haoid, lada ka jingiohpateng ka  
long ka babun kane ka rukom iabynta lang ka long ka  
babha bad badei eh, hynrei ngim lohi ba ka long ka  
babha lada ka spah nongtymmen ka long ka barit lane  
ba tang khyndlat.

Katba ha ri Khasi-Jaintia, lait noh katno katno ki  
jaka ha ki thailñ War bad Bhoi, ym don jingpharia tukra  
ia ka khyndew ka shyiap, hynrei ka jingktah jong ka jing  
lasam bad ka jingphiah lyngt hot lyngkhai ia ka khyndew  
ka shyiap ha kylleng ka ri India ka la long ka bajur katta  
katta, kat haduh ba ka la pynkhih ia ka Sorkar Punjab  
ha ki snem 1937 bad 1948, ia ka Sorkar Uttar Pradesh  
ha ki snem 1939 bad 1953 bad ia ka Sorkar Bombay ha  
ka snem 1947 ban thaw aiñ ban pyntylli ia ki jaka nong-  
kynti ba la rit than eh. (Consolidation of holdings). Nalor  
kata, kitei ki Sorkar jylla haneng ki la thaw aiñ ruh ban  
khang ia ka jingiasam ne ka jingphiah ia ki ri-kynti ka  
ban pynrit ia ki na ka jingheh ba la buh (Prevention of  
fresh fragmentation). Namar ba ki nongiohpateng ki  
kwah ban loh bynta lut ha manla ki nongkynti kiba don  
ha ki kyntoit bapher bapher jong ka shnong, kumta ka  
ne ka rukom iabynta lang ka wallam ruh ia ki jingia-  
pher jingmut bad ki jingiakaia ha kaba pynbeit ia u pud  
u sam. Ka jingiada lane ka jinglait na ka jingtukra ka  
khyndew ka shyiap bad na ka jingbun ki kynrum kyn-  
ram ha ka jingiapynbeit ia u pud u sam, ka paw shal  
kdar kum ka sngi ba ki Lengshuwa-Manshuwa jong ngi

kim shym la tbit tang ha ki kam saiñ hima sima hyare  
ki la long ruh ki *Stad jong ka loh ka kot* (Economists).\*

Kumta kat kum ka jingstad jong ka loh ka kot (Economics). ka jingioh bun ne ka jingioh lut ka khun khatduh la ka kamai kajih, ka spah ka phew jong ki kmie ki kpa ka long ka babha ; hynrei namar ki *jingkylla ha ka ri kiba la shah nok ia ka iktiar jong u Kñi bad kiba la pyntlot ia ka bor jong ki Kur Synrang*, kane ka rukom jong ngi ka la iatyngkhuh ia ki jingeh bad jingwit kiba la pyntlot bad pynswai ia ka spah jong ka ing ka sem. Kane ka jingktah ka long ka bajur bad ka trei stet haduh katta katta, ba lada ym don ka jingpynbeit-thymmai barynth kaban iadei bad iahap kat kum ka jinglong jong ka ri ha kane ka juk, ngin sa lohi bad ngin sa mad ruh ia ki jingkylla ha ka loh ka kot jong ngi hi, kiba ngin pangnud ban peit bad ngin babe ban pyrkhat.

- 
1. Ka Kitab Niam Khein Ki Khasi.
  2. Ka Niam Khasi
  3. Marriage And Family In India
- \* Studies In Indian Economics.
-

## LYNNONG—II

**KA KAMAI BA TANG SHIKHMAT (Shipateng).**

Ha ka lynnong banyngkong ngi la iapule lyngkot shaphang ka dustur lohpateng, ngi la iakren ruh ia ki jingbha bad ki jingsnlew kiba don ha kane ka rukom bad khyndiat de ngi la kdew la ka jingbymiadei shuh kane ka dustur jong ngi ha kane ka juk mynta. Naduh kane ka lynnong ter ter ngin iawad bad iapeit bniah ruh ia ka jingktah jong kane ka rukom ba la shong syier ha ki bynta bad ki rukom trei kam trei jam bapher bapher jong kane ka ri.

Da ka jingwan ki jingkylla ha kane ka ri jong ngi kum : ka lynti ka synkien, ka rukom trei rukom ktah, ka jingnang jingstad, ka imlang sahang bad kiwei kiwei ; te ka jingktah la ka kamai kajih na ka rukom hiarpateng ka spah ka phew bad ka kam ka jam jong ki Khasi, kaba ngi loh ha baroh, la ka khat pateng, ka jingtrei karkhana, ka kam kontrak ne kiwei kiwei pat ki kam lajong (business), ka long ba baroh ka kut noh tang ha ka pateng jong u briew uba seng ia kata ka kam. Ngi ju shem kynrei ruh ba tang shu khlad noh u trai nongseng jong kano kano ka kam, kata ka jingtrei-kam ruh ka leit noh sha la ka lynti ka jingduh jingdam.

Haba ha kiwei pat ki jaitbynriew, ka kam jong u kpa ka neh bun bun pateng hadien ka jingiap noh jong u, hynrei ha ki Khasi pat ka kam jong u kpa ka hiar noh arsut, bad don ruh ba ka duh noh tang ha ka por ba u kpa um lah shuh ban trei ne ban pyniaid hi da lode. Hato kane ka dei na ka jingbleit pyrkhat bad ka jingbymnang pyniaid jong u Khasi ? Ha ka rukom trei ki Khasi : "Ki pyni ba ki long ki babit ha ka trei ka ktah, ka shoh ka thaw, kum ki kam misterl dieng, nar bad ter ter .....Lada ai lad ha kino kino ki kam ki jam, lah ban loh shai ba ki don ka jabieng ka baproh, ka bor pyrkhat ka bashemphang .."<sup>1</sup> Kumta lada ha ka synshar

khadar u don ka jingbit ban pyniaid bad ban trei kino  
 kino ki jait kam ruh u Khasi u long u bakloi ban shem-  
 phang, te ban ong ba ka jingbymlah ban bteng bad ban  
 pynneh bun pateng ia ka kam ka jam ka dei na ka jing-  
 bieit pyrkhath ne ka jingbymnang pyniaid, kam long ka  
 bashongnia.

Na baroh ki daw jong ka jingbymneh bun pateng ka  
*khih ka khan* (business), ka daw tynrai ka dei ka *jinghiar-*  
*pateng ka spah bad ka kam ka jam sha ka khun kynthai*  
*kaba hap hu ka bor bad ka jingpyniaid u lok jong ka*. Namar  
 ba u rangbah u dei u nongkamai, te kumta ia ka kam  
 jong u kpa dei ban shimti bad pyniaid da u pyrsakurim.  
 Ha ki por hyndai mynba ym pat don ki surok kall bad  
 kiwei pat ki lynti ki syngkien kiba pynstet ia ka leit ka  
 wan, ka jingiashongkha shongman ruh ka dang long  
 tang para-shnong parathaw ne para ba latrei ia kajuh  
 ka jait kam. Kumta ka jingshimti da u pyrsakurim ia ka  
 kam u kthaw kam shym la snlew kumba ka long ha kane  
 ka juk jong ngi mynta.

Mynta pat ba la stet ka leit ka wan, te ka jingialeit  
 iawan bad ka jingia-ithuh-ithaw ruh ki la iar kylleng saw-  
 dong ka ri ; ka shongkha shongman kam long shuh tang  
 bad ki para-shnong para-thaw ne bad kiba marjan  
 shnong, hynrei ka la long ruh bad kito kiba sha jngal  
 ha kiba ka rukom trei rukom ktah ka la iapher bak-ly-bak.  
 Kumta u pyrsakurim um lah kot bor ban pyniaid lane  
 um shimti ia ka kam jong u kthaw lajong. U Khun uba  
 don ka sap kpa bad uba la loh jinghikai ruh ha ka jing-  
 trei jong u kpa, um don hok ban loh kynti pateng ia  
 kata ka kam ; hynrei u kynum jong u pat, ubym tip ei ei  
 bad ubym shym la iohi ruh ia ka khia ka shon jong u  
 kpa, u loh longtraai pynban halor kata ka kam. Kane ka  
 jingwit ha ka rukom lohpateng ia ka khli, ka khan, ka  
 pynlong ia u kthaw ba un da peit bniah bha ia ka jingbit  
 trei kam bad ruh ia ka jinglong ba lah ban shaniah jong  
 u pyrsakurim lajong shuwa ba un aiti ia ka kam ka jam.

Kumta katba u kthaw bad ka kiaw ki dang iapeit bad pule ia ka jinglong jinglm jong u, u p/ysakurim pat (uba longtraí lyngba ka lok jong u) um da sngewshkem la la ka jinglongtraí bad un kwah ban seng la ka jong ka ka kam lane un wad noh da kano kano ka lad kamai. Ban da u don lei la ka kam lajong bad wat la ka rit ruh ; te ha ka jaka ba un shimti bad pyniaid ia ka kam jong u kthaw ba la heh lypa, un ialeh shitom ban pynheh bad pynbha hi ia la ka jong. Kane ka rukom ka pyntlot bad ka bthat noh ia u ksai rupa uba bteng ia ka jing neh bun pateng bad kumta ka khih ka khan u Khasi ka kut noh tang ha ka rta jong u traí nongseng hi.

Ka jingsngewthuh ia ka jingshisha ba ka khih ka khan kan neh tang ha ka pateng jong u nongseng ka pynlong ia u Khasi batbit, ban pynheh bad pyn'ar ia la ka kam katba u dang eh dang khlaiñ haduh ba kam ia biang shuh bad ka baiseng (capital) lane bad ka bor pyniaid jong u. Haba ka jingtrei ka la heh paiat ia ka bor korbar wan pat sa ka jingduh, ka jingtroiñ bad ka jingkyllon syndon jong ka kam Nalor kata, haba ki khun shynrang ki la heh ruh kim da salia eh ban trei bha ; namar ki tip ba kim longtraí halor kata ka kam. Na kane ka daw bun bun ki khun riwspah ne ki khun nongkhañ pateng, ha ka jaka ba kin trei la ka kam lajong, ki trei pynban da ka kam shakri Sorkar ne da kano kano ka jait kam.

Haba u kpa u la pynlang bun ka spah ka phew da la ka jingminot, jingkunai bad jingtrei shitom lajong, la un ai trei kam ha u p/ysakurim ruh u sheptieng bad u syier ioh u pynngop namar ka jingbymmlien bad jingbieit, ban aiti ha u khun pat un leit rah belt sha iing ka lok ; kumta u set noh ia la ka spah ha synduk lane shu buh noh ha bang (bank) ban loh bam ioh sa ha ki sngi ka jinglong-tymmen. Dei ha kane ka rukom ba sa mih ki laiphew sker ki jingkhangelad ia ka jingroi jingpa bad ka jingklew shaphrang jong ki khun U Hynñiew Trep ha ka khañ-



pateng bad kiwei de ki jingkhiih jingkhan (businesses); bad nangta pat ka spah ka phew, ka kam ka jam la ne ka kamai kajih jong ngi ki Khasi ka neh tang shikhmat ne shipateng.

Ki jingeh jingthaiñ bad ki jingwit jingwa kiba don ha ka rukom jong ngi, ki pynlong la bun ki Khasi bariew spah bad badon ba-em ban kham iabeh ia ka thied kall (motor); namar ba kane ka jait jingtrei kam da donkam ban pynlut por bad ba pyniaid, hynrei shu buh tang u draibar bad u handimien ka la shu biang hi. Ka kam kontrak ruh ka dei ka jingtrei ba ki Khasi ki iabeh bha namar ba ha kane ka jait kam la ka bai iohnong la pynkheñ bad pynmang lypa da ka Sorkar, bad ia ka jingpyniaid ruh la s imti lem da ka. Lada ban thied kali ne ban trei kam kontrak badonkam da ki phew hajar tyngka ruh dang don ki Khasi kiba iatrei; te kumno keñ ia kiwei pat ki jait kam lajong badonkam baiseng tang da ki hajar tyngka la shu ioh ei da ki shongthap?

Ka kam ka badonkam tang ia ka bor labieng, ka bor pyrkhath bad ka sap jong u briew, kaba ym ju don ki pyr sakurim kiba la shimti ban bteng ne pynheh pyniar la kaba la don, dei ka kam thoh kot. Kane ka long ka kam kaba mih pisa kumba kyrsoi ka umpot liew bun phew snem hadien ka jinglap jong u nongthoh Kumta ngi iohi wat hapdeng ki Khasi ruh, la ka kam thoh-kot la ju kham shimti da ki khun shynrang; bad ka roi bad kiew sha-phrang kumba lajong lem kiwei pat ki jaitbynrlew

Te kumta ba ka kam ka jam, bad ka kamai kajih kin iaineh pateng la pateng, bad ba ka jaitbynrlew jong ngi kan lakot kyrdan lem bad kiwei pat ka la dei ka por (bad kam pat djer ruh) ba la ka dustur lohpateng yn la pyrkhath bad pynbeit thymmai, kat kum ka jinglong jong kane ka juk, ka rukom-trei rukom ktah bad ki jingkylla bym lah kiar ba la wan ha kane ka ri baieit jong ngi.

1. Ka Riti Jong ka Ri Laiphew Sylem  
Ka Bynta Ka Banyngkong.

## LYNNONG—III

## KA KHAĪ PATENG

Ka khaĭ pateng ka long kawēi na ki jingtreikam kaba pynmih bun ka kamaĭ kajih bad kaba lah ruh ban pynlang kyrhai ka spah ka hajar. Ka kam bakongsan jong u nongkhaĭ ka long ban thied ia ki mar ki mata lane ki jingmih na ki thaiñ bapahuh, bad ban die pat ia ki ha ki jaka kiba duna ne kibym don kum kita ki jait mar ne jingmih. Kumta nalar ka jingloh kamaĭ la lade u pynbiang ruh ia ka jingdonkam jong ki briew ha ki bynta bapher bapher.

Dei ha ka pneh jong ka spah ka hajar, la ka long ha ka dur jong ka tyngka pliah ne ki jingdon jingem, ba ka iktiar bad ka bor ki shong tynrai. Ki babun hi na ki nongkhaĭ pateng ki long ki badap babiang bad kumta ki don bor ban pyntreikam la ka built ha kaba ki lah ban pynlong kam ia la ki jingthmu. Ha ka banyngkong ki Phareng ki la wan sha ri India tang kum ki nongkhaĭ hapoh ka East India Company (ka kompani khaĭ kaba na ri Bilat). Suki suki kane ka kompani Khaĭ ka la don bor bad ka la jop thma ia ki babun ki hima-syiem ha ka ri. Kumta ha ka bakhatduh ka la kylla long nongsynshar ia ka ri India bad hadien pat ia shimti da ka Sorkar Bilat kaba la neh haduh ka 14 tarik, u Nailar (August) 1947. U Napoleon, u khlawait uba la kylla long Patsha jong ka France, bad uba la pynkhynñiuh ñiak bad pynshyrkhei rem la ka ri Europe hi baroh kawēi, u la shah pynliem ha "Ka jaitbynrlew jong ki nongdle dukan;" namar dei u Rangbah shipai ka Bilat U Sir Arthur Wellesley (U Duke of Wellington) uba la jop thlaw la u ha ka madan thma Waterloo. Nangne ngi-loh la ka sabut bashai kdar kum ka ngi, ba ka spah ka iktiar, bad ka bor ki don bad ia-laid ryngkat ryngkat bad ka khaĭ pateng.

Wat la ka jingloh jingkot, ka jingkhraw, bad ka jingrel jingsan jong ka jaitbynrlew ki shong shibun ha ka

kha! pateng ; pynban ha kane ka juk jong ngi mynta ngi loh! bad shem, ba la kane ka jingtrei badonkam eh la pynlaid bad korbar kham bun da ki kynthei. Kane kaba trei bad pynlaid da ki longkmie, ynda haba ngi la iakhleh bad kiwei pat ki jaitbynrlaw, ka wallam la ka jingsahdien bad jingtrolai ha ka kha! pateng jong ngi ki Khasi. Nalor ka jingtlot jong ki longkmie ha ka bor met bor phad bad ha ka pyrkhat pyrdaiñ, la nang pynthut bad pynwit shuh shuh la ki ha ki por ba ki loh khun loh kti ; nangta bud pat sa ka jingsumar suker la la ki khun katba ki dang rit. Ha kane ka liang, ka Sorkar ka ju ai shuti kha khun la ki kmie kiba trei haduh lai bnal. Kumta ha ki por ba kim lah trei, ki kynthei Khasi kiba kha! pateng ki duh sing duh la, ka jingiohnong ka lehnohel, bad ka kamai kajih pat ka troiñ noh ; namar ha ka kam lajong khlem da trei te ym lah ban loh jingmyntoi ei ei. Khnang ban kham pynmih kamai bad ba ka kam ruh kan laid ryntih, ki hap ban leit trei noh tang shu kham *khlañ* malu mala. Kane pat ka ktah ia ka jingkoit jingkhlah jong ki, lut sa ka bai dawai dashin bad ka wallam ruh sa ka jingkyrduh ha ing ha sem. Haba ka jingkoit jingkhlah kam bha, kim banse ban sangeh noh syndon la la ka kam ba ki trei.

Haba ki kmie ki leit trei, donkam pat sa ki nongtrei kiban peit ban jngoh bad ban sumar suker ia ki khun ki kti, bad ban korbar de ia ka ing ka sem. Nalor ba ki nongtrei kim lah ban shim tylii lut ia ka kyrdan longkmie (khamtam eh ia ka sneng ka kraw), ngim ju kham shem ha ki nongtrei kin sah bun snem tang ha kawel ka ing ; namar ki ruh ki iawad ia la ka jingbit bad jingmyntoi, te tang shu loh kam bakham bit shawei pat kin leit trei noh shata.

Katne ki jingeh ia ki longkmie kiba leit shong lew ahng hat ha la shnong ; hynrei ka bakham shitom bun phe v shah ka long ia kito kiba leit lew nongwei kylleng kylleng. Ki dei ban mih na ing naduh dang step phyrngab, ki hap ban lehnoh bareh shing i la la ki khun la

kti, bad kin wan phai pat sha la ing ynda mled haduh ba ki khun rit ki la thiah.

Katto ngi la iakren shaphang ki jingeh la ki longknie kiba shong lew shong hat bad kiba leit lew kyl eng kyl leng ; mynta pat ngin lapeit kumno kine ki jingeh ki ktah la ka khai pateng jong ki.

Ngi lohi ia ka kam khai pateng jong kiwei pat ki para Nong-India ba wan shong shong ha kane ka ri la pyn-laid da ki shynrang. Ki shynrang kim don bun ki jingeh jingwit kumba don ki kynthei ; ka jingwit ia ki ka long tang haba ki pang la lade, bad lada shitom ki khun ruh kim hap shong sngi ban sumar la ki. Kumta la ka babun na ki kam khai pateng ha ka ri jong ngi, la trei bad pyn-laid da ki kynthei hapdeng ki Khasi bad da ki shynrang hapdeng kiwei pat ki jaitbynriew. Haba kumta, ka jing-khai jongno kan kham roi bad kham kiew shaphrang ? Nalor ba ia ki Theikhasi la ker sawdong da ki jingeh bad jingwit kumba la pyni haneng, bad lada ka jingong :— "U shynrang u long u rang-khatar bor khatar buit bad ka kynthei pat, ka theishibor shibuit," ka long da shisha ka badel ; te kilem artaten ka khai pateng ba pynlaid da u rangbah kan kham roi kham iar ban ia kaba pynlaid da ka kynthei. Te haba ki Theikhasi kim sngew ah pynlaid pat ki ai wai noh ia la ki dukan, bad teng teng ka ju pol ruh shaduh kaba die noh syndon. Kumta katba ki dukan Khasi ki nang trofi nang duh bad ki nang jah kawei hadien kawei pat, la nang mih plie de ter shi ter da ki dukan ba-iphuh iphieng jong ki jaitbynriew kiba shongthap hangne.

Haba kumne, balel pat ki Rangkhasi kim wan ban shimti ia ka khai pateng jong ki longknie ? Hato balel keiñ ba ki rangbah jong ngi ki breit tasam katne katne, haduh ba ia ka spah ba don ha la ka ri ruh la shim suk bad khur ei da uba nabar ? Kane kam dei na ka jingbieit jong ki rangbah ne na ka jingbymkwah spah jong ki;

tyntel ka dei na ka jingbymiahap shuh jong ka dustur  
lohpateng jong ngi namar ka jingkylla ha ka trei ka ktatt,  
ka rukom ai kamai ki shynrang bad ka imlang sahlang  
bakhleh bun rukom.

Ha ka rukom jong ngi ka kamai kajih, ka spah ka  
phew, lane ka jingdon jingem jong ki kmie ki kpa ka  
leit sha ki khun kynthel. Khnang ban sngewthuh shel  
ia ka jingktah jong ka dustur lohpateng ia ka khei pateng  
jong ngi ki khun u Hynñiew Trep, to ngin shim kawel  
ka nuksa :—

Uwei u nongkhai uba don ka dukan bahoh ha Iew-  
duh, u don uwei u khun shynrang bad kawel ka khun  
kynthei. Namar ba ki dei ki khun ngelt sneng, bad  
u kpa ruh u long u batbit ban ai jinghikai; te kumta  
baroh ar ngut ki ju iarap die jingdie, bad nalar ka  
jingmien ha ka kam, ki la loh pdiang ruh ia ka sap  
jingnang jingbit na u kpa ha kaba pyniaid ia kata ka  
dukan. Katba u kpa u dang eh dang khiañ, bad ki khun  
ruh ki dang shong khyntaw; ka die ka thied ka thnem  
bha bad ka kam ruh ka roi bad kiew irat shaid shaid.  
Kumta katba ki sngi ki nang iaid ki snem ki nang tyl-  
lun, kata ka dukan ruh ka roi ka pa bad ka kam ka la  
teh bun phew shah; haduh ba uta u nongkhai u la  
kylla long u briew badap kyrhai ka spah ka hajar.

Ha ki snem ki bahadien, haba u kpa u la noh ka mel  
bad um lah leit korbar hi shuh da lade, kita ki khun ruh ki  
la loh la ki khun ki kti; te kata ka dukan ka la leit sha ka  
kti jong ka khun kynthel kaba loh lok da u briew uba  
trei kam Sorker. Te kumba ialong lem ki para-longkmie  
baroh, kata ka khun kynthel ryngkat bad ki jingeh jing-  
wit ha ka kha ka pan, ka loh khun loh kti, ka sumar  
khun sumar kti, bad kiwei de ki jingpynwit kiba ju  
don ha ki longkynthei, ka la shimti bad pyniaid ia ka-  
ta ka dukan. Namar ba la tynrong da kine ki jingeh  
ka khun kynthel kam lah shuh ban pynbit pynbiang

la ka kam kum mynshuwa; ka die ka thied ka la pjah;  
ka dukan ka la nang ring bad nang rit, bad ka synduk  
tyngka ruh ka la edang ban rwa.

Haba kumno, kumno kin leh? U khun shynrang,  
uba la nang bad la tbit lypa la ka kam, mynta um  
longtrai shuh bad u la trel da kawei pat ka kam. Na-  
mar ba u pyrsakurim um ju mlten ha ka khaï pateng,  
kumta um sngewnang pynlaid bad um treh ban shimt  
la ka dukan. Kumta la ka dukan la dei ban shu buh  
nongpynlaid noh da u briew, lada kam mih jingioh-  
nong kumba khmih lynti pat, la dei ban shu ai wai noh ha  
ka dor bekham heh; bad lada kwah ban ioh spah syndon  
shislen ioh, ki trai dukan ki hap ban die duh syndon  
ha uta uba don tyngka pliah ban thied ha ka dor ba-  
rem kaba fyn ym kham don koit ki *para-kher para-mer*  
kiban, jakot bor ban bel pisa.

Ka rukom jong ki Okhar lane ki Pharang pat ka  
long ba ka jingiohpateng ka hiar sha ka liang shynrang.  
Kumta lada une u nongkhaï u dei u dohiong, u dohieh  
lane uno; uno uwei pat u kynja bynriew uba don ka  
rukum fohpateng kaba long markhongpong la ka jong  
ngi, ka dukan kan leit sha ka kti u khun shynrang.  
Namar ba u khun u la ioh lypa la ka jinghikaï, ka jing-  
nang jingbit, ka jingmlen ha ka kam, bad ka sap  
ba hiarpateng na u kpa, te un lah ban nang pynroi  
bad pynheh pynlar ia ka dukan bad kumta pateng la  
pateng.

Dei ha kane ka rukom keifi, ba ha ka jaka ba  
ngin longtrai bad pynlaid ia la ka khaï pateng da lade  
hi kum mynbarim, la long kynrad bad korbar pynban  
da ki laiphew bynriew kiba nang iaithap ruh mrong kum-  
no ban ioh kynti ia kane ka kabu kalar lada ngi bleit  
ban aiti la ki hok ha ki.

Ngi thoh bad pyni hengne la ki jingeh jingthai, ki jingwit jingwa bad ngi kdew ruh ia ka daw tynrai kaba la pynhlar pyntröi ia ka khal pateng jong ki khun ka ri Khasi-Jaiñtia; da kaba kyrmen skhem ruh ba ngi ki trai-muluk trai-jaka, ngin kyndit briew noh ban khyllie patia ka khal pateng; U Khasi hyndai, kumta ba ka ri kan roi kan pa bad ka jaitbynriew kan kiew shaid shaid ha kane ka liang trai-kam ba shong ka spah ka hajar, ka ber bad ka iktlar de.

Nalor kata, to ngin pdiang naduh ka dohnud, ngin pyrkhath khia mynsiem bad ngin pynlongkam ruh artat ia kine ki tiensneng ki Tymmen hyndai, kiba la lum la lang bad la thoh myn-hynñewphew san snem da u Radhon Singh Berry, u Riewstad Ka Akor Khasi:—

“ To hikai ia la ka khañ ka pateng,  
Khun Khasi, khun War khun Bhol, khun Synteng;  
Lada'm bun baiseng ruh na lade hi,  
Tang ba iai mnot kan roi Suki;

.....  
.....  
.....  
.....

To hikai pynnang la ka khañ ka diah,  
Thir la jingmut ha bashong bathiah;  
To khmih thuh wat ha ki nongwei nongar,  
Da kumno ban wan jia ka kem ka lar;  
Da khalai biang ha la ka jingmut;  
‘Kah biang thik ka long briew na kut shakut.’”<sup>1</sup>

## LYNNONG—IV

## KA KHAĪ PATENG HA SHILLONG

Ha ka lynnong ba la dep, ngi la lapule bad iatainia shaphang ka daw tynrai kaba la pynlong ia ka k ai pateng jong ngi ki khun U Hynñiewtrep, ban leit sha ka kti bad ka jingpynlaid jong kiwei pat ki jaitbynriew. Mynta hangne pat ngin iapait katto katne, kumno kane ka ktah la ka khaĭ pateng ha sor Shillong.

Ka Shillong, nator ba ka long ka nongbah jong ka Meghalaya, ka dei ruh ka shnong khaĭ pateng ba eh e bad babun briew tam ha kine ki jylla ri um thairi mihngi jong ngi. Ka pisa kaba leit ha ka jingiadie iathied bad ka jingsiew jingtda ha kane ka nongbah ka long da ki phew lak tyngka (ne da ki klur pynban) shi sngi shi sngi ; kumta ka jingiohnong kaba pynroi bad pynriewspah ia ki nongkhaĭ ka long da ki phew hajar tyngka manla ka sngi. bad ha ki sngi *bathnem* bha ka die ka thied ka poi ruh da ki lak tyngka.

Ka Shillong ka long ruh ka kmie jong ki iew ha ka ri Khasi-Jaiñtia. Ia ki jingmih bad ki mar ki mata kiba wan kiew na sha ri Dkhar la wallam shuwa ha k , bad nangta pat sa pynphriang ban die kylleng ka ri lyngba ki nong khaĭ. Ha kajuhi ka rukom ia ki jingmih na sawdong ka ri jong ngi la lum shuwa hangne bad nangta ki sa shalan sha kiwei pat ki ri. Ngii lohi ruh ia ki surok ne ki lynti mator-kad na baroh ki thairi jong ka ri ba ki iashem 'ut khoit ha kane ka nongbah ; lane, kane ka Sor ka dei ka thymmei ba long *Pyrđi* la baroh ki surok ka ri Khasi-Jaiñtia. Kumta ka Shillong ka long ka shnong khaĭ pateng badonkam tam ha kane ka ri jong ngi.

Hynrei kaba sngewsih, kaba pynpangnud bad kabā ijew mynsiem de slam, ka long ba ha kane ka juk mynt-  
 ha ka babun bah bun san ka jingkhaĭ ha kane ka Sor la



longtrai bad pyniald da kiwei pat ki jaitbynriew ; katba ki khun U Hynriew Trep kibym don lad don lynti pat, ki hap ban shu long tang ki nongtrei ha ki dukan ba-iphuh iphleng jong ki. Ka Shillong kam shym don ha Syndah (khappud) Ri thor, hynrei ka long ka shnong ba shong pdeng jong ka ri ; namarkata, ngi lah ban ong bad ban ngelt ruh ba ha ka banyngkong nyngshab baroh ki nong-khai pateng bad ki nongdie jingdie ki la dei tang ki Khasi suda. Mynta to ngin iapylait por khyndait ban pyrkhat kumno ka khai pateng hangne ka leit sha ka kti bad ka bor jong ki laiphew jaitbynriew.

Ka daw bakongsan tam, kaba la pynstet ia ka jing-leit noh ka kam khai pateng na ka kti jong ki Khasi sha ka jinglongtrai jong kito ki nongwanbuhai-shnong ha Shillong, ka long ka jinglaknieh-lahdie (competition) hapdeng ki nongkhai kynthai bad ki nongkhai rangbah. Kumba la ong ha ka lynnong ba la dep, ki longkmie jong ngi ki trei bad pyniald ia ki kam khai jong ki ryngkat bad ki jingeh bad jingpynwit bahar rukom ; kumta kim lah shan bad kim lah kyrda ruh ban laleh pyrshah la ka jingkhilai barynth bad baskhem jong ka khai pateng ki Rangrithor, bad nangta ki dukan Khasi ki troi noh bad ki jah kyrteng de kawei hadien kawei pat ; te ha ka jaka jong ki pat la mih pli ter shi ter da ki dukan ba pynrol spah jong ki nongwan-shongthap. Kane ka jingkhyllem ka khai pateng ki Khasi kam shym long tang ha Sor Shillong hi, hynrei ka long kumjuh ha manla ki lew ki hat jong ka ri ha kiba kiwei pat ki kynja-hynriew ki loh lad ban long nongdie jingdie. Namar ka jingia-kyllum eh ha ka trei kam trei jam bad ka jingiatyllan than ha ka leit ka wan ; te don ki khap ha kiba ka jingshongkha u laiphew jait nongkhai ha ki nongthong-lew jong ngi ka long kabym lah ban kiar. Kane pat, wat ta ka long ka jingia batengkhut ruh, ka wallam, nian ta ka jinglongtrai baskhem ba jong u laiphew bynriew thalor ka khai pateng ba la shong syier jong ngi.

Ngi lah ruh ban ong ba ka khaī pateng u khun Khasi-  
Pnar ka leit sha kiwel pat namar ka jingbleit bad jing-  
duk. Kane kam long kaba baroh ngin lahap jingmut—  
namar ngim shym sahdien lane bieit sah, bad don ruh  
bun bah ki Khasi kiba don spah don phew bad ki don  
ruh kyrhai ka jaka ka puta. Nalor kata, ka jingkhaī khu-  
tia (retail trade) kam donkam ka seng ka dang (capital)  
ka baheh katta katta kat haduh ban da khang lad syn-  
don sbak ia ki parari Palpdeng, ban trei ia kane ka jait  
kam. Nangta pat, ki Khasi hyndal ki la long ki batbit  
bha ha ka khaī pateng, bad ka jingpoi u Sohñiamtra  
ka ri jongngi; slem bah mynshuwa, shaduh ri Syria bad  
Europe ka ai ia ka sakhi bashai kdar. "U Sohñiamtra ka  
ri Khasi bad Jaiñtia u la pawnsam la slem bah. La ong  
ba ki nongkhaī Arab la slem bah ki pynpoi ia u sha  
Syria bad nangta u sa poi sha Europe." <sup>1</sup>. U Lt.  
Colonel P.R.T. Gurdon uba la long nongbishar ha ka  
ri jong ngi, u thoh shaphang ka khaī pateng ki khun u  
Hynñiew Trep kumne! "Namar ba ki Khasi ki long ki  
nongkhaī bakhraw kine ki baikhrong ki long bunsien  
ha ki iew ki bakham heh ki badondor shibun (mih pisa  
bun). (As the Khasis are great traders these tolls are  
often at the larger markets family valuable)." <sup>2</sup>. Te kumta,  
kumba mynhyndal ki Khasi' ki la long ki nongkhaī ki  
bakhraw bad batbit, mynta ruh ki lah ban long kumjuh hi  
lada ki lah ban ioh lad bad jinghikai ha kajuh ka rukom  
kumba ioh kito ki jaitbynriew kiba wan seng khaī pateng  
hangne; kata, ba u khun un shimti bad ioh ia ka jing  
longtral ia ka kam khaī pateng na la u kpa lajong,  
hynrei ym na u kthaw-kurim kumba ka long mynta.

Halor ka jingshisha ba ka kam khaī U Khasi ka neh  
tang shipateng, pynban ngi iohi ha Sor Shillong ba don  
ki dukan jong ki parari kiba la neh haduh ar ne lai pateng  
bynriew bad ki rol bad kiew shaphrang kum ki dukan  
jong ki shongthap shongbiang hi. Kane ka long namar  
ba la ka jingpynlai bad jingtrei ia ka kam la shimti da u  
khun na u kpa lane da u pyrsa na u Kāi (ha kiba dang  
bat ia ka rukom kamal ingkur).

Ngi ju shem pat ba don ki nongkhai kiba la aiti la ka jingpyniaid la la ka kam ha ki khun shynrang, hynrei ka jingkhai jong ki kam shym la neh bad ka nang rit bad nang ring pynban ; bad ka long hi kumha shimti da ki khun kynthei lane da u pyrsakurim na u kthew. Kane pat ka long namar ba ka jingai la ka bor pyniaid khlem don ka jinglongtrai halor ka kam ka pynsniew la ka kam bad la u khun ruh. (Namar uel uban lah ban kitkhia la kael kabym del la ka jong ? Mano keifi bym peit bad wad la ka jingbit jingblang na ka bynta la ka jingim baroh shilynter ?). Namarkata, haba ki kmie ki kpa ki aiti la la ka khai ka patong ha u khun shynrang ki dei ban aiti ryngkat bad ka hok longtrai ; lynda kumta, kata ka jingaiti pyniaid kam kan pynsniew mynslem la ki nongai bad kan pynshong kynrong bad pynkulmar jingmut ruh la u nongpdlang.

Nangta pat ngi lohi tyngkreifi ha lewduh, ba la ka kam die dohmasi bad dohnsiang dang bat bad pyniaid hi da ki Khasi. Ki don katto katne ki dukan die dohmasi jong ki Musulman, hynrei la ki babun te dang pyniaid hi da ki Khasi. Haba lajan ha baroh ki dukan die jingdie ha lewduh la bun da uwei pat u lalphewbynriew, hato balei keifi ba ha ki basa die doh pat de dang bun hi ki Khasi ? Kane kam del mo parari, ba la ka jingpyniaid la ka kam die doh la bat da ki Rangkhasi bad ym da ki Thel jong ngi ? Ngi ngelt bad kyrmen ba baroh ngi ia sngewdel bad lamynjur ruh ba del ka jingtrei bad jingpyniaid da ki rangbah kaba la pynneh la ka kam die dohmasi bad dohnsiang ha ka kti jong ki Khasi. Nalor kata, ka del ruh ka kam hiarpateng jong ka Mawlai—namar ki babun hi ki Nongdie dohmasi ha lewduh ki dei ki Nongmawlai. Haba kumta ka jingiaknieh lah die (Competition) ka long para rangbah. Ki bushor ki ju pyndonkam da ka die tat dor (ka buit babha tam ban ring ia u nongthied) ; hynrei namar ba ka doh ba ot ki Khasi ka kham bha, te wat la ka kham rem ruh ki kham lah die pynban ma ki. Kumta ngi kyntu bad kyrpad jur ia ki Nongdie doh jong ngi, ba

kin nang kham pynbha bad pynjanai shuh shuh ia la ka kam ba ki dang bat, ba u wanwlr wanhab un nym loh lad ban wan knieh ia ka kamai kajih bad ka spah ka phew jong ka ri ; bad ba kin long ruh kum ka nuksa babha ka-ban pynlong ia ki Rangkhasi ban iamih ter ter sa ha kiwei kiwei de ki jait kam khai pateng.

To lada ngi pelt bniah bad bishar bha ruh, ngin iohi bad ngin shem ba ngi ki Khasi ngim dei keifi ki babieit palat ha ka khai pateng ; hynrei ka jingsahdien had jing-randien jong ngi, ka long namar ba ka rukom lajong hi kam al lad ai lynti ba ngin roi bad kiew shaphrang ha kane ka liang trei kam Namarkata, ka la dei ka por ba ngin weng noh syndon ia ka tynrai ka jingbymneh ka kamai kajih, bad ba ki shynrang Khasi kin iamih pyrtlei ban shimti lem ia ka khai pateng ba la troin jong ka ri. Lada ka East India Company ka la synshar ia ka ri India, kumno te ka khai pateng kan ktah ia ka ri Khasi Jaiñtia bad Meghalaya ? To ngin kyndit bynriew noh mynta kumne, bad ngin iatylli lang baroh ban iapyrkhat bad rai ban leh ia kaei ba ka jaitbynriew jong ngi ka donkam bad ka dawa ba kane ka pateng jong ngi ka dei ban pyndep.

- 
1. Ka Geography Khasi.
  2. The Khasis.
-

## LYNNONG—V

**KA JINGIAR BAD KA LAD BAN LONGTRAI BIANG  
HALOR KA KHAÏ PATENG.**

Katba ki briew ki nang roi parum pareh ka jingdawa ia ki mar ki mata bad ka bam ka dih ka nang kiew artet, bad ka khaï pateng pat ka nang heh bad nang iar ha ki bynta baroh. Haba peit na kane ka liang, ngi iohi shai ba ka long ka badei ban nang pynheh pyniar shuh shuh ia ka khaï pateng ha Sor Shillong.

Ka jingkhapngiah ka lewduh ka la long ka bapalat haduh ba bunsien ki nongleit siew leit tda ki atyngkhuh parabriew, ki shah syllad la ki pla-siew ba ki kleng ne ki khoh ba ki kit. Hynrei ka basniew eh ka long ka jingioh'lad ki nongkloh-pla ban khura ia ki pla bad tuh ia ki pisa jong ki nongleit siew. Katno ka long ka ba isynei bad isangsot ban peit ia kito kiba hap hapoh kane ka ktemi jong ki nongkloh-pla; namar lynda ki don kiba haing hasem ne ki paralok parajor kiba lah ban lakyrshan pisa lem, ki dei ban shu leit phai thylli beit sha la ing.

Ka jingiabeh ki nongkhaï ban ioh jaka ha lewduh ka long ka bajur katta katta, haduh ba la hap ban pynlong jaka die jingdie harud lynti, ha syndah dukan lane da kaba shu ieng ryngkat bad la ki jingdie. Lada ngi pyllait por ban peit bniah ngin iohi ba kynrei kyrhai ki longkmie jong ngi kiba die madan bad niar eh ban shem ia kiwei pat ki kynjabyrniew ba kin die jingdie ha lynti ne tyngkhap jong ki dukan heh; bad ki khmat pat kin thait ian shuwa ban iohi ia U Rangkhasi ba u shong die dukan ha lewduh. Kane ka long ka bynta bakhrav kaba dei ban pyrkhath khia bad sani—namar bun bah bun san ki nongkhaï trai muluk kiba shong bad phriang la ki jingdie ha madan bad khyndiat eh kiba don la ki basa bad dukan lajong. Kane ka long kum ka it kaba pynpaw ia ka jingduk, jingkyrduh bad jingtroin jong ka jaitbyrniew jong ngi; bad

lymda ngi kyndit briew noh mynta 'kumne kan poi ka por ba ki pateng longdien jong ngi, kin ym loh jaka shuh ha kane ka lew wat tang ban loh khem la ka jakyntien.

Namar kane ka jingkhəpnghlah, ka lewduh ka la lar bad pylar la ki thapniang; hynrei ka ba-phylla ka long ba kam shym heh ha ki phang baroh—ka iar pynban tang shaphang mihngi bad sepngi, katba ha ki bynta bashatei bad shathie pat ka shu long hi kum ha ki por mynshuwa. Kumta lada dro ia ka dur jong ka, kan syriem ia ka slm kaba plar la ki thapniang hynrei kaba la shah phut noh ia u tdong bad shah khrai khleh naduh syndah tyrpeng.

Ka Jingdon ka len shipai ka la khang lad sbak ia ka jingmih ki dukan ha ka liang shathie, bad la don katto katne tylli ki karkhana kiba la shah pynsangeh ha ki bor shipai. Kawel na kita ka dei ka karkhana ot dieng jong ka K.J. Hills District Marketing Co - Operative Society Ltd., la kaba la pynkynriah noh sha Mawlai-Nongpdeng mar shilliang wah bad ka madan Weiking. Kumta ngim lah shuh ban pynheh la ka lewduh ha ka liang bashathie; lait sa tang da kaba pynkynriah noh ia ka Len sha kawet pat ka jaka.

Katba ka Jingplie dukan bahar rukom, ha ki ar liang jong ka Surok Shillong—Gauhati ha ki kyntoit Karikhana bad ha ki rud Surok ter ter haduh ban da iasoh bad ka Khyndai Lad, ka long ka ba - ishongshit bad iphuh lphieng bha, ki rud surok jong ka Mawkhar bad Jaiaw pat ki ipjah slam slam. Lada ka jingnangheh ka lewduh ha ka phang shathie la khang da ka len shipai, ka mynsiem bympatiaw ne bym kheiñ snep ia ka khai pateng jong ki trai ing trai jaka pat, kam ai lad ai lynti ia ka jingieng ryntih ki laiphew jait ki dukan ba pynroi kamai kajih ban nang mih ter ter ha ka phang bashatei jong ka lewduh.

Katba ka jingthnem ka die ka thied ha lewduh ka la ring kum ka maknet la kiwei pat ki nongkhai nabar, ki rangbah Khasi pat kim i don jingpatiauw ei ei, bad imat i kumba ki khmat jong ki ki sur matlah ha kane ka liang treikam. Kaei keiñ kaba la set kut bad khang tala ia ka mynsiem khai pateng u Khun Khasi? Hato kane kam dei namar ba ki shynrang kim longtrai la ka spah, kim ioh jinghikai na la iing bad ba ka khai pateng kam hlar na u kpa sha u khun? Naba ñiar eh hi keiñ ban shem la ki iing nongkhai Khasi ki ban ai pateng ia la ka kam ka jam ha u khun shynrang, hynrei ki babun balang te, ki sngewhun mynsiem ban alti ia la ka jingkhai ha u pyrsa-kurim. Kane keiñ ka dei ka dawbah jong ka jinghiar arsut bad jingtroiñ ka khai pateng jong ki Khasi.

*Kumno* ban ioh pat ia ka khai pateng—Ka jingbym-don lad jong ki parakher paramer ha ki kam khai pateng, ka long kawei na ki jingeh bad jingpisa mynsiem—kaba la pynkhih lynga ia ki jingmut jingpyrkhat jong uno uno u riewleit ri bashisha. *Te kumta* ban *pylluit rik* la la ka jaltbynriew na ka jingpang khrew ha ka khai pateng, bad ban bet ruh ia u symbai ha kane ka lyngkha treikam; ngi buh hangne ia u salpyrkhat ba ki paradoh parasnam kin ioh ban lapuson, laphylliew jingmut bad iatal bniah bha thik pa thik khnang ba ka nam khai pateng u Khasi hyndai kan khle im blang. Ha kane ka liang ngi lah ban ring ksei ha ki ar tylli ki bynta :- Ka jingpynioh biang la kitto ki dukan ba la ju aiwai baroh shikatta bad ka jing-pynheh shuh ia ka lewduh ha ka phang bashatei.

Shisien ba la aiwai, ka long kaba da eh bad jwat than ia u trai dukan ban ioh pat ban trei kam da lade; bad wat la u don dukan makna ruh u hap ban trei noh da kawei pat ka jalt kam. *Te kumta* ba ka *khai pateng kin wan noh sha la* *kti jong ki khun U Hynñiewtrep*, kan bha ba baroh ki trai dukan kin aiwai ryngkat bad ka jingieteh kyrmil ba da tip bed ituh da ka ingshari ha kata ka rukom, ba ki trai kin lah ban shimti noh ha lade ia ki dukan ha kano kano ka por

*ba ki donkam ; hynrei kane ka por kam dei ban palat na ka shipateng trei kam; kata, hapdeng arphew bad arphewsan snem. Ha kane ka rukom, ka kyrmit ka lah ban long tang shisien iateh haduh 20 ne 25 snem lane kan long lai, san lane shiphew snem; bad lada pynthymmai ruh kam dei ban slem palat na ka 20 bad 25 snem. Kane ka kyrmit kan khanglad ia u nongwai dukan ban pynhiar pateng la la ka kam khai na u kpa sha u khun, hynrei kan neh tang ha ka pateng jong u nongseng hi. Ki khun nongkhai kiba shu wai dukan kin ym loh lad shuh ban long nongkhai bad kin hap ban trei noh da klwei pat ki jait kam kumba long ma ngi ki Khasi mynta. Ha kane ka bynta ngi kyrpad ia ki trai dukan ba kin kham pyrkhat kylluid mynsiem ia ka jingbit jingbiang jong ki para kher para mer kiba shu shong wai.*

Hato kane ka jingiateh kyrmit ka long kaba shong aiñ? Lada ha ka kam Sorkar u briew um lah ban trei palat na ka por ba la buh, bad um don hok ruh ban pynhiarpateng la la ka kam ba u trei ha u khun ne kiba ha ing ha sem, te kumta kane ka kyrmit ka long kaba ladel bad ka aiñ trei kam trei jam bad ka long hi ka bynta jong kata ka Indian Contract Act, 1872; namarkata, ngim iohi ban don daw ei ei ba ki bor synshar kin ym lthuh ia kane. Ka shong eh, namarkata, ha ki trai dukan trai basa ban don la ka mynsiem khai pateng, kumta ba ha ka jaka ban shu loh tang ka baiwai kin long noh ki nongkhai batbit kum mynbarim.

Ka jingwallam pat ia ka khai pateng sha ki para-kher paramer ha kane ka rukom ka long kaba shim por slem than; kumta ngi buh sa kawei pat ka mat, kaba lada kito ki parari kiba don lad ki pdiang ban pyn trei kam ia ka, khlem artatien ka jaitbynriew jong ngi kan long ka ba laitfluid ym tang ha ka synshar khadar, hynrei kan don bor ruh de ha ka loh ka kot tang hapoh kine ki san bad shiphew snem ei ei.



Lada ngi iaid suki jai bad peit khongkhai bha ia ki ar liang surok naduh Lad Hospital, Jaiaw haduh Motphran, ngin iohi ba don bun ki ing kiba dang don hi ki jaka babit ban shna kano kano ka jait dukan kaba lah ban bsa bad pynbiang ia kata ka ing kaba plie dukan. Ha kajuha ka por ba ngi ud bad ngi lynñiar sat, 'bym ioh kam shi bym ioh kam,' ngi tap matlah pat la ki khmat ia ki kam bad ki jingtrei jingktah kiba don ha phyllaw ing lajong. *Te kumta lada kuwei pa kuwei ka ing rud surok naduh Motphran haduh Lad Hospital, kan plie noh la la ka dukan die jingdie kan iarp ban pynkylluid ia ka leuduh bad ha kajuha ka por, kin ai kin ai jam bud jingtrei jingktah ia bun bun ki khun samla jong ngi kiba shong khlem kam.* Lada ki dukan rud surok ha khyndai lad bad Jail Road, naduh neng Donbosco haduh jan Ingmane Presbyterian ha Laitumkhrak bad ha ki thain Karikhana, ki lah ban bsa khun bsa kti; te tharai lada ki parari ha ki ar liang surok ha Mawhar bad Jaiaw Pdeng, kin plie noh la la ki dukan kin ym lah mo ban long ka jingkyrshan baratbah ia ka ioh ka kot ha ki ing ki jong ki? Ha kane ka liang, ka jaitbynriew ka donkam eh ia ka jingkyrshan paradoh parasm, kumta ba ka pisa kaba pynlut kan long ka Umpohliew kamai ia la ki kher ki mer; bad ki nongdie pat kim dei ban bam iohnong palat than, hynrei ka dor ka mur ka dei ban iatap bad ka dor iew dor hat.

Khnanng ba kine ki ar liang surok kin long ki ba-khuid, baitynnat bad ba-iphuh iphieng, kan long kaba iadei eh ba kine ki dukan thymmai kin buh tang ia ki kynja jingdie kibym pynmih jakhlia jakhlaid ne jaboh jabaiñ ei ei kum :- Ki jaiñ ki nep, ki juti ki muja, ki tiarshet tiartiew, ki jingbuh jingsat, ki sopti ki sopjat, ki kot ki sla, ki dawai ki dashin bad kumta ter ter. Namar ba ki nongshongshnong ka ri Khasi Jaiñtia ki dang bun hi ki khun u Hynñiewtrep, te lada lah ban plie ia kine ki dukan thymmai ngi kyrmen bad ngeit skhem ruh ba ka die ka thied kan long kaba iaid bha shaid shaid. Kumta ki nongdie kin ym duh jingkyrmen shaphang ka jinglaid jong ki mar ki mata.

Ba ki nongthled kin loh ia ki mar kiban pynbiang bad pynhun ia ka jingkwah bad ka mon jong ki (kaba long ka daw tynrai jong ka jinglahdie kaba pynneh ia ka longrynieng ka khai pateng), ka bakongsan eh bad badonkam tam ka long ba kine ki dukan thymmai kin lamih lang ter ter tang hapoh shisnem bad ar snem ei ei. Da kaba sngewthuh shai kdar ba ka khai pateng ka long ka tyllong kamai kajih bakhraw spah kaba la khot bad khring ia ki riewkrai na kylleng ki jaka ka ri India bad nabar ruh, bad ba kane ka jingplie dukan ka long ka kabu ksiar ban ai kam bad jingtrei jingtah ia la ki khun ki kti; kan bha ba ki trai ing ha kine ki jaka kin iawad baiseseng baidang—da kaba shim tyngka kylliang na ki bank; ki Seng Bhalang ruh kin pynjynsur ia ka mynsiem iarap bad ka Sorkar de kan bei tyngka kaban iabiang bad kane ka jingdonkam. Nangta pat, lada ki Khasi Hyndai ki lah ban bei pisa ia ka jinglut bakhraw ha ka Thep Mawbah da kaba lum ia u synniang u bynhei ryngkat bad ka pynkham ka pynsoh, te ki riewmynta ruh ki lah ban pynmih balseng baidang ia ki trai ing jong kine ki ar liang surok, da kaba shim bad bud ia ka nuksa babha bad ka mynsiem iarap bad iakit lang jong ki Khasi ha ki por barim.

Lada ngi pynlut por ban laid kai kylleng ka Sor Shllong, ngin shem ba don iew ha Laban, Malki, Jail Road, Laitumkhras, Polo, Umpling bad ha Mawprem ruh la sdang ban don iew; hynrei ngim lohi syrngiew lew ei ei ruh em ha Lummawbah, Umyngka, Mawlai, Riatsamthiah, Wahingdoh bad Jalaw. *Te na ka bynta ban kham kylluid ku lewduh bad ba kan long noh ka Iew hek kaban shalan mar, kam bha mo ban plie iew marbam mardih noh ka kito ki jaka bym pat don iew mynta?* Lada ka iew Pongkung, ka iew Sohlong bad ka iew Tyrsad ki dang mih hadlen ka jingplie surok, bad ka die ka thied ka laid bha; te ngi kyrmen ba kita ki iew Sor kiban dang plie thymmai ruh kin long ki balarkam.

Haba iakren shaphang ka khai pateng, ki babun balang ki kubur ba ki Khasi hyndai ki kheiñ kor bad ki tbit

bha ha ka khai pateng, bad ki riewmynta kim long ei ei haba ianujor bad ki. Kane ka long ka bashisha, bad ngi pule ruh ba: "... ki Sohra ki pynlaid ia ka jingkhai jong ka ri Laiphew Sylem baroh shaphang ri Shilot haduh Dacca, Bengal. Ia kane ki tymmen Khasi ki lathuhkhana shai eh haduh mynta"'. Na ka kot jong U Rev. G. Angell Jones, ngi loh jingtip ba ki Khasi ki ju leit lakhai bad iadie lathied sha ka shnong Pandua kaba ha khap-pud Bengal (Bangla Desh) bad ha kaba don ka iew ka hat ka bakham heh. Nangta ngi pule shuh shuh ba: "U Jonkha . . . u la plie dukan ha Mawsmal . . . . U Babon u don dukan ha iew Sohra," bad " . . . U Muno. Une ruh u long u nongdie jingdie ha iew Sohra,"<sup>2</sup> Kumta ngi lah ban mutdur bad ban kynmaw tymbang ruh haduh katno ka khai pateng u khur Khasi hyndai ka roi ka san, ka heh ka iar bad ka ieng rasong bha; lada ngin iapyrshang bad nujor ha ka rukom-badei, kane ka jing-iengrasong ka khai pateng u Khasi hyndai kanym da iapher eh na ka jingkhai jong kine ki laiphewbynrlew mynta. Nangta pat, ka jingpaw kyrteng jong ki lai ngut ki Shynrang Khasi ha ka kot kabym dei shaphang ka khai pateng, ka ai ia ka sabut ba ki shynrang Khasi hyndai ki long kiba imsnagi bad kitkhia bha ia ka kam khai pateng.

Ngi la iohi tyngkrein da la ki khmal, ba ka jingpynlaid ia ka khai pateng tang da ki longkmie Khasi, ka la pynhlar arsut bad ka la pynjah pyndam ruh ia ka nam khai pateng u Khasi hyndai. Kumta ka long ka kamram bamardor jong ki rangbah kane ka pateng mynta, ban shimti lem ia ka kam khai pateng; bad ba ki kmie ki kpa pat kin ai lad ai lynti ia la ki khun shynrang, ban long ki nongkamai nongkajih kiba pynheh pyniar bad pynneh pynsah ia la ka spah nongtymmen nongsan. Lada ki rangbah Khasi ka juk mynta ki don ka mynsiem trei-kam khai pateng kum ki jong u Johkha, u Babon bad U Muno ryngkat ruh bad ka mynsiem ban ialeh bad iaksaid ban lait na ka jingtlot jingswai ha ka loh ka kot; te ka jingdap jingbiang bad ka

jingkiew shaphrang kin wan ha kane hi ka pateng jong ngi mynta, bad ngin ioh bat biang ia u lakam ka jingioh jingkot kumba ngi la ioh kynti ia u rist.ot ka synshar khadar. Hynrei lada ki shynrang ki dang sur matlah hi ha kane ka liang, te ngin long ka pateng-bynriew kaban long ka daw tynrai jong ka jingngop ka jaitbynriew; bad u rishot nong-kynti ka synshar khadar un khylllem khlem lah khie khlieh shuh hapoh ki tyrsim jong ka jingduk jingkyrduh.

- 
1. Ki Dienjat jong ki Longshuwa.
  2. Ka History jong ka Balang.
-

## LYNNONG—VI.

## KA JINGTREI KARKHANA.

Ngi dang shu dep pule shaphang ka khai pateng bad ngi la iohi ruh haduh katno ka jaltbynriew jong ngi ka tlot ka swai, ka hiar arsut bad ka troiñ ha kane ka jingtrei badonkam. Mynta pat ngin iaphai sha ka jingtrei karkhana bad ngin iapeit ia ka jingkieu bad jinghiar ki parakher paramer jong ngi ha kane ka ja t kam.

Ka kam karkhana ka long kawei na ki jingtrei jingktah badonkam tam jong u khunbynriew kylleng ka pyrthei. Ki ri kiba la iaid shaphrang bad ki bariewspah ha ka pyrthei, ki dei kito kiba don bun eh ki karkhana. Nammar ka jingpynmin bad ka jingshalan bun ki tiar ki tar bad ki kor ki bor, te baroh ngi iabna ia ka nam bad ngi tip ruh ia ki kyrteng jong ki ri: America (U.S A), Russia, Japan, Bilat bad Germany; hynrei ngim ju kham iohsngew ia ki kyrteng jong ki ri: Equador, Peru, Kenya, Dahomey, Togoland, Tunisia bad Basutoland; bad wat ki khynnah kiba pule ia ka Geography pyrthei ruh ki shem jingeh ban kynmaw kyrteng ia ki.

Kumba ngi b m bad pyndonkam na ala ka sni ia ki jingmih na ka rep ka riang, kumta ruh ngi donkam khlieh ka sni ia ki tiar ki tar ba shna ha ki karkhana. Ngi lah ban pyndonkam ia ki tiar ki tar bad ki jingmih na ki karkhana ha ki ar rukom :- (1) Ki tiar kiba ngi donkam ha kaba trei ba ktah bad pynmih kamai kajih (Capital goods) kum: Ki Mohkhiew, khulom, wait, kor suhjaiñ, kor shonkot bad kumta ter ter; bad (2) Ki jingmih oa la pynkylla dur kum: Ka Umsoh ba la pynmin na u soh, ka shini na u pai, kotsada na ki diengkseh bad ki siej, ka juti na ka snieh bad har rukom kiwei pat ki jait jingdonkam. Haba kren lyngkot, ki tiar bad ki jingmih na ki karkhana ki leit lut sha baroh ki jait jingpyndonkam bad jingtrei jong ki briew. Kumta nalar ba

ka jingtrei karkhana ka long ka badonkam, kan nang heh nang iar bad nangklew artet katba ki briew ki nang iaroi parum pareh bad ka jingbun briew ka nang iaia sha-phrang.

Na ki lai tylli ki jait kam balar bad badonkam tam: Ka rep ka riang, ka khai pateng bad ka kam karkhana; ka bæh tam ban seng bad ban pyniaid dei ka jingtrei karkhana. Namar ba bun than eh ki jnit ki jnat ha ka, te kane ka jait kam ka shim bad donkam lang ia ka bor met bad ka bor jabieng jong u nongtrei. Kumta ka donkam ia u nongtrei ban ioh ka por bakylluid ban hikai trei ia kane ka kam—U briew uba trei mekhanik u dei ban trei ei shuwa khlem bainong, haduh ba u trai karkhana un da i iapsngi ban ai tulop ia u. Te kumta u briew uba la don la ki khun ki kti, lynda u dei u baon bakot, um lah shuh ban leit sdang trei ia kane ka jait kam.

Namar ba ka long ka kam ka bæh bad bakhia, bad kaba donkam ruh ia ka jingkhlañ ka met ryngkat bad ka bor pyrkat bablang; te kumta ha ngi ki Khasi ruh, ia ka jingtrei karkhana la shimti bad pyniaid da ki shynrang. Wat la ka jingtrei bad jingpyniaid ka long ha ka kti jong ki rangbah, hynrei ngi iohi ba ki karkhana Khasi kim roi bad kim klew shpahrang kum ki karkhana jong kiwei pat ki jaitbynriew. Kumba ka long ha kine ki por mynta, ia ka jingtrei karkhana ha kane ka ri jong ngi dang ioh bat bad pyniaid lang da ki Khasi bad ki shongthap ruh. Hynrei haba peit khongkhai bad bishar bniah bha, ngi iohi ba ka por kam slem shuh ba kane ka jait kam ruh kan sa leit noh sha ka kti jong kiwei pat, kumba ka la long ha ka khai pateng.

Ngil la ong ba ka khai pateng ka leit sha kiwei pat ki jaitbynriew namar ba ki nongkhai kynthei jong ngi kim lah kyrda ban ialah pyrshah la ki nongkhai shynrang. Te kumno pat keñ, haba la ka kam karkhana la trei bad pyniaid da ki rangbah; pynban kane ruh ka jait kam ka

la i kumba kan sa leit noh sha ka kti bad jingpyniaid jong ki shongthap shongbiang? Ka daw jong kane ka long beit namar ba ka jinglongtraia ka kam karkhana jong u kpa ka leit sha ka khun kyntlei kabym lah bor ban pyniaid ia ka. Naba kane ka dei ka kam u rangbah, te ha ka bakhatduh ka jingpyniaid ia ka karkhana kan leit sha ka kti jong u pyrsakurim; bad dei ha kane ka rukom keiñ ba ka jingtrei karkhana jong u Khasi ka troiñ, hiar arsut bad ka kyllon ruh hakmat ka jong kito kiba don ka rukom bamarkhongpong ia ka jong ngi. Kumta ha ka rukom jong ngi ka jingtrei karkhana ka hiar pateng na u kthawkurim sha u pyrsakurim, bad kane ka la pynlong ia ki karkhana jong ki Khasi ban ym neh palat na ka shipateng me ar pateng.

Kaba ngi ju iohi bad shem ha kane ka juk mynta ka long—haba u briew uba seng ia ka karkhana u dang eh dang khlaiñ ka kam jong u ruh ka roi ka man bha; hynrei ynda u la noh ka met, ka karkhana jong u ruh ka sdang ban hiar arsut. Kumba ju long ha ki babun balang, ki khun ki iasyriem bad ki bit shibun ia ka jinglong, ka pyrkhat ka pyrdaiñ bad ka jabieng jong u kpa. Kumta haba u kpa u trei karkhana ki khun jong u ruh ki tbit ia kata ka kam, bad ha ki por ba um lah pyniaid shuh da lade, u la dei ban aiti ha u khun shynrang. Namar ba u dei ban shong ban sah bad ka khun kynthei bad ka dustur lohpateng ruh ka long sha ka liang kynthei, te kumta um lah ban aiti ia ka karkhana ha la u khun lajong. Ba ka kamai kajih, ka spah ka phew kan leit sha ing ka lok u khun ha kaba u kpa um shong um sah, ka long kaba pyrshah ia ka aiti longspah longhajar u khun Khasi Khara. Kumta hapdeng ka jingartatien ia ka jingneh bad jingroi jong ka Karkhana u dei ban aiti ha ka khun kynthei—ka batlot bor, bad ha u pyrsakurim—ubym shym ioh jinghikai, jingtbit bad jingmlen ha ka kam. Hangne keiñ ka shong tynrai ka daw jong ka jinghiar bad jingtroiñ ka jingtrei karkhana u Khasi.

Ha ka rukom Khasi ka shongkha shongman ka long da ka jingiaieit bad jingiamon jong ki ar ngut; kumta u

kpa uba don la ka karkhana um lah ban pyniateh bad pyn-  
iathon ia ia ka khun bad u briew uba trei karkhana. Te  
lada ioh pyrsakurim da u briew ubym ju trei karkhana—  
uta u dang dei ban shah hikri ban nang trei ha kane ka  
jait kam, bad kan shim por slem bah ia u ban k'ew kat  
shaduh ka kyrdan kaban labiang ba un long u nongyn-  
laid ne nongkorbar.

Da ka jingshongk'ha bad ka khun kynthei ka jinglong-  
trai ia ka karkhana kan leit sha u pyrsakurim ubym pat  
lah ban pynlaid tylli ia ka; hynrei kum u trai jong ka kam,  
un shim no'i ia lade ia ka bor pynlaid bad ka jingkor-  
bar (management), katba ia ka jingtrei bapaka pat  
(Technical branch) dang dei ban trei hi da u khun.  
Kumta u khun, uba don ka sap-kpa bad uba la ioh jing-  
hikai, jingtbait bad jingmlien ia ka kam, u dei ban shu  
long tang kum u nongtrei ha ka karkhana jong ka kur  
bad u kynum jong u. Namar ba ia ka jinglongtrai bad  
ka jing, yniald la shimli da u briew ubym don ka jing-  
nang bad jingtbait ha ka kam; te kumta ka karkhana, ha  
ka jaka ba kan roi bad kiew shaphrang, ka shu neh ha-  
juh lane ka hiar arsut noh pynban. Na ka bynta ka  
jingbit jingbiang ki khun ki kti lajong, u khun un seng noh  
la ka karkhana; bad lada um don baiseng u lah ban leit  
trei noh sha ba kham heh ka jingioh (namar uei ubym  
wad ia ka jingmyntoi ia lade?). Nalor kata, ka shait jia ruh  
ba u u klun jong u trai karkhana u trei kam sorkar bad  
u pyrsakurim pat u don la ka kam lajong. Haba kumta,  
ka jingtrei bad jingpynlaid ia ka karkhana ka hap ban  
long ha ka kti jong ki nongtrei.

Mynta ba ngi la iakhleh bad kiwei pat ki kynia-byn-  
riew, ka dustur iohpateng ka la ktah jur bha ha kaba pyn-  
randien ia ka jingtrei karkhana jong ngi. Ha kiwei ki jait-  
bynriew ka kamai kajih, ka spah ka phew lane ka kam  
ka jam ka hiarpateng sha ki khun shynrang; bad dei na  
kane ka daw ba ka jingtrei karkhana jong ki, ka roi, ka  
iar bad ka neh ruh bun pateng hadien ka jingkhlad noh  
u nongseng jong ka. Katba u Khasi u dang khustai bad



ialeh shitom khui shi khui ban ioh baiseng baidang, uwei pat u jaitbynriew u shu pynheh beit ia kaba la seng da u kpa lajong. Namar ba ka rukom hiarpateng ka kam ka jam jong u Khasi ka long kumba siat khnam da ka tiehbatur te kumta katba ki shalyntem ka por ki nang tyllun bad ki briew ki nang iaroi parum pareh, ki karkhana Khasi kin nang randien bad kyllon kawei hadien kawei pat; bad ha ka jaka jong ki yn mih pli da ki karkhana jong ki shongthap kiba don ka rukom baryntih bad baskhem.

Ha ka jingshisha ki Khasi ki long kiba da nang bad tbit bha ha ki kam karkhana; bad kumta ngi iohi la ki nongtrei Khasi lajan ha manla ki karkhana ot dieng bad karkhana kali. Namar ba ka rukom aiti kam jong ngi kam ai lad ia ka jingroi bad jingkiew shaphrang jong ka jingtrei karkhana, te kane ka jingtbit ka shu long leh-nohei; bad ka kylla jingmyntoi pynban ia ki trai karkhana nawei pat.

Ki Khasi hyndai lei lei—mynba ki kni ki dang donbor bad ia ka kam jong u kni la shimti da u pyrsa-kur—ki nang ban saif nar hi, kata, ki tih nar na ki par bad ki sa thaw nar. Lada ngi iad kylleng ia ka ri Khasi-Jaiñta, ngin shem jaka jaka ia u maw bapher uba ngi khot u 'Mawsarong'; une u dei ka eit nar ba la kyntait ha ha por ba ki riewhyndai ki saif nar. Ki kni ki kpa bamynbarim jong ngi ki nang ruh ban shna wait, moh-khiew, suloi bad kiwei pat ki tiar nar; bad ki la pynmih nar bad shna tiar ym tang na ka bynta ka jingdonkam ha la ka ri, hynrei ki la shalan ruh shaduh ki pyntha jong ka Brahma bad Surma. "U Tymmen Ralmon u iathuhkhana ba, na iew Snapur u ju ioh wallam masi raikhoh da kaba iapli tang mar kawei ka masi bad kawei ka napkhapshiah. Iohi na kane ba katno hyndai ki Dkhar ki dang ñiewkor ia ka tiar nar, bad na kata, katno ki Khasi ki riwbha ki manbha na ka bynta ka tiar nar ba ki thaw ki wet".<sup>1</sup> "Ka jingsaif nar ka la long shisien ka jingtrei bakongsan jong ka ri Khasi, bad bun bah ka

nar<sup>o</sup> la ju shalan sha Shilot, da ka narliang bad da ki tiar nar ruh ..... (The melting of iron was once the chief industry of the Khasi Hills, and a Considerable quantity of the metal used to be exported into Sylhet, both in crude and manufacture state ..... )<sup>2</sup>.

Nangta shuh shuh u Lt. Colonel P.R.T. Gurdon u ong: "U Colonel Lister, ha ka snem 1853, u antad ba 20,000 mon u nar 'a shalan na ki ri lum ha ka dur jong ki Mohkhiew sha rithor Assam, bad da ki narliang sha ki pyntha ka Surma, ha kaba la pyndonkam da ki nongshna lieng kum ki tiar pyndait Don bun ki shlem ha kiba ia u nar madei mata na rithor la saiñ biang bad la shna wait bad mohkhiew U Dr. Oldham, ha ka snem 1836, u ong, "ka jinghha jong une u nar Khasi ka long kaba da paka eh na ka bynta baroh ki jingdonkam kumba ia u nar Sweden la pyndonkam mynta. Un long ruh u isbad (Isbad India) babha tam.... ... Ngam don jingartien ba ja ka shoh ka thaw lah ban nang kham pynbit pynbiang bad pynheh pyniar. (Colonel Lister, writing in 1853, estimated that 20,000 maunds of iron were exported from the hills in the shape of hoes to the Assam Valley, and in lumps of pig iron to the Assam Valley, where it was used by boat builders for clamps..... .. there are many forges where rough iron brought from the plains is melted down and forged into billhooks and hoes .. ... Dr. Oldham, writing in 1863, says, "the quality of this Khasi iron is excellent for all such purposes as Swedish iron is now used for. It would also form steel or woots (Indian Steel) of excellent quality..... I have no doubt that the manufacture could be greatly improved and possibly extended".)<sup>3</sup>.

Na kitei ki jingthoh haneng, ngi ioh ia ka sakhi ba-shai kdar ba ka jingtrei nar u Khasi hyndai, ka long ka kam baroi kyrhai; bad u nar ba ki saiñ ha kane ka ri u long u babha tam wat ha ka ri India baroh kawei. Kan long ka burom bakhraw ia ka jaitbynriew, ba lada kino

kino kaba dang don bad kiba lah ban pyntrai kam la ka buit sañ nar jong ki riwhyndai, kin pynmih pyrtrei ban pynim biang ia ka rukom sañ nar u Khasi jong ki por barim.

Haduh katne, ki Longshuwa manshuwa ki la lah ban pynpaw nam ia la ka ri bad ka jaitbynriew; to ngin kut jingmut triang, namarkata, ban ialeh dukhi khait ban pynim pat ia ka nam jong ki, da kaba ngin seng bad pynlong rukom ban neh bun pateng ia ki kam karkhana lyngba ka jingai jinghikai bapaka ryngkat bad kaba alti ia ka jingpyniaid bad jingongtra i ha ki khun shynrang. Ngi don kyrhai ki jingmih (raw materials) bad ka bor-trei (power) ban seng bad trei karkhana :- Ka snieh masi, ki diengkseh bad slej, latyrpad bad kiwei ryngkat ruh u dewiong bad ka ding elektrik.

Wat la ngi don kyrhai ki lad bad da lade ruh ngi long ki batbit ban trei; hynrei ngim dei ban lalot bad sngewsarong pa'at than ia ka jingroi bad jingkieu shaphrang jong ka ri, da kaba ngi khot ia ki riwspah na kiwei pat ki jaka ban wan seng bad trei karkhana hangne Namar lada ngi leh kumta --hadien habud bad wat mynta hi ruh--ngin hap ban long tang ki nongtrei bad ki shakri hapoh jong ki, te ka jingkieu shaphrang jong ka ri kan ia id syndah bad ka jingrandien jong ka jaitbynriew. Ka dei te, namarkata, ba ngin ieng ha la ki jong ki kiat bad ngin seng karkhana ban iabiang bad ka bor bad jingbun briew jong ngi hi (balance growth), te kumta ka ri bad ka jaitbynriew kin iaroi iapa bad lakiew shaphrang ryngkat ryngkat.

- 
1. Ki Dienjat jong ki Longshuwa.
  2. Essay on Khasi Heritage (A collection)
  3. The Khasis.
-

## LYNNONG—VII

## KA REP KA RIANG

Ngi la iohi ia la ka jaitbynriew ba ka hiar palat ha ka khaī pateng bad ka shong syer de ha ka jingtrei karkhana, mynta pat ngin iapule sa ia ka rep ka riang.

Ki babun bah ki traishnong jong ka ri Khasi-Jaiñtia ki im da ka rep ka riang, kaba long ka jait kam barim tam ha ka pyrthei baroh kawei. Wat la ngi trei ia kiwei pat ki jait kam ruh, hynrei ngi shaniah ia la ka jingim ha ka rep ka riang; naba ngi dei ban thied ia ki marbam mardih kiba pynmih da ki nongrep. Haba ki jingthung jingtep ki bha baroh ngi iatit bad myntoi lang; hynrei iada ki sniew pat ngi iashitom bad kyrduh lang, namar ba ki marbam mardih ki kiew dor. Ngi ju shem ba u khaw u kham tat ha ka por tlang namar ba u mih bun ha iew ha hat; hynrei u kham rem pat ha ka por lyiur naba duna ka jingmih. Kumba ka kali ka donkam ia ka petrol ban pynlaid ia ka, kumta ruh ngi donkam ia ka jingbam ban kyrshan ia ka jingim. Namar kata ka rep ka riang kan iaisah katba u khunbynriew u dang pynhiar mynsiem ha kane ka snieh pyrthei.

Ka rep ka riang ka ai jingtrei jingktah ym tang ia ki nongrep, hynrei ka ai kam ai jam ruh ia ki nongkit, ki kali, ki rel, ki nongkhaī, ki nongtrei karkhana bad kiwei kiwei de. Da ka jingkit bad jingdie ia ki jingmih na kawei ka jaka sha kawei pat, ka rep ka riang ka pynioh kam ia ki nongkit nongbah bad ki nongkhaī pateng. Ki jingrep kum: U pai, u soh, ki ai jingtrei ia ki karkhana ha kaba pynmih shini bad umsoh. Kumta ngi iohi ba ka rep ka riang ka dei ka nongpyndap pynbiang ia ka khaī pateng bad ka nongiarap ruh ia ka shoh ka thaw. Ngim dei te ban kheiñ poh ia kane ka jingtrei kaba long ruh ka nongbsa nongbtiah ia u bynriew.

Haba peit ia ki nongrep, ngi i kumba ki pyndonkam tang ka bor-met khlem ka bor-jabieng ; hynrei kam long kumta, ka kam rep ruh ka donkam ia ka bor pyrkhat pyrdaiñ. Ka ri jong ngi kam da seisoñ, kumta ki nongrep hangne ki pyndonkam kham bun ka bor-pyrkhat ban ia ki nongrep ha kiwei pat ki ri baseisoñ ; bad ha ka jaka ban thung tang shi jait ne ar jait, ki hap ban rep bun jait ki jingthung jingtep. Te kumta ki nongrep jong ngi ki dei ban tip bad ban nang ia ka rukom rep ia bun ki jingthung kum U kba, u riwtheadem, u phan, u kral, ki jhur balaiphew jait bad kiwei kiwei de ; ha kaba uwei pa uwei u jait jingthung u donkam ia ka jong ka jong ka rukom trei.

Ngin shim katto katne ki jingtip tynrai kiba man uwei pa uwei u nongrep u dei ban don. U nongrep u dei ban tip bad nang ban kheiñ ia ki saw aiom jong ka snem—ka pyrem, ka lyiur, ka synrai bad ka tlang. U dei ruh ban tip bad ban nang kheiñ ia ki khatar bnai jong ka snem, bad ban tip de ia ka por ne ka aiom badei ban thung jingthung ne ban bet symbai. Ka jingshai bad ka jingdum bnai ki don ka jingiadei bajan bad bakhraw shibun bad ka jingmih bad jingheh jingsan jong ki jingthung jingtep ; namarkata, ka jingtip lad ka jingithuh ia ka jingtyllun u bnai sawdong ia ka pyrthei ki long ki badonkam eh ha ka kam rep kam riang. Ka por ba u bnai u shai rong ka long ka por badei ban kiar na kaba thung lane kaba bet, khamtam lei lei haba sdang ia ka kam ; kata, ym dei ban sdang thung lane bet ha ka sngi ba u bnai u dang shai rong. Kumta uwei pa uwei u nongrep u dei ban tip bha ia ka por bad ki sngi ba u bnai u mih, u rit, u shai rong, u pyllun, u ngen bad u iap. Nangta u dei ruh ban nang ban pynkhreh ia ka khyndew ban thung ia ki jingthung ha la ka rukom rukom, bad ban thung lane bet ha ka por babiang ; namar lada thung lap eh ruh u jingthung u snlew, bad lada thung dier eh pat um long lane man bha shuh.

Ha ka iingshisha ka rep ka long ka jingtrei ka ba-eh bad sani bha; hynrei ki nongrep pat, ki sngew ba ka long ka bajem bad ka shu shim tang ia ka bor met. Kane ka long namar ba ki khun nongrep, naduh ba ki dang khynnah, ki la ju leit trei kper trei phrah bad trei lyngkha risai bad la ki kmie ki kpa. Wat ha ka por ba kim pat lah trei ruh, ki ju leit sha ki jaka trei bad ki lum jingtip bad ioh jinghikai, da kaba kylli pyrthew na la ki kmie ki kpa ia ki rukom trei rukom ktah ba ki iohi. Haba ki la don bor ban trei pat, ki iatrei iaktah lang bad ki kmie ki kpa bad ki ioh jinghikai ruh artat artat Namar ba kane ka jinghikai ka long da ka ktien bad ka kam (theory and practical), te ka jingtip ba ki lum ka neh skhem bha. Haba ki la rangbah ki dei ban trei da ka bor-met bor phad ryngkat bad ka bor pyrkhat pyrdaiñ—ki dei ban tip bad ban pyntreikam ia ki jingtip tynrai shaphang ka rep kumba la ong haneng. Te kumta haba shu kren lyngkot, u nongrep u shong skul naduh ba u dang khynnah rit haduh ba un da long rangbah. Imat, dei na ka jingeh bad jingsani ka jingtrei, ba ngim ju kham shem ia ki brierw kiba shong ba sah bad kiba im khynnah khyllung ha Sor Shillong; ba kin rep kin riang ynda ki la rangbah Nalor kata, ka rep ka riang ka don kam ruh ia ka balseng baidang ka baheh.

Katto ngi la iakren shaphang ka jingdonkam bad ka jingeh jong ka rep ka riang, mynta pat ngin iaph i sha ka jingktah ka rukom imlang sahang jong ngi ia ka jing-laid shaphrang jong kane ka jait jingtrei. Namar ba ka babun ka jingtrei rep ka dang long tang ha ka kti jong ki parakher paramer, te kumta ngim da iohi eh ia ki jing-duna bad jinghiar jong ngi ha kane ka liang, kumba ka la long ha ka Khaī pateng bad ka jingtrei karkhana. La katta ruh, ka jingwan buha shnong jong ki nongwei na ki rashing jong ki lum Mangkashang ha ki nongkyndong, bad khamtam eh ha ki thaiñ baseisoh jong ka ri Bhoi, ka long kabym kai shuh; namar dei kine kiba pyndap dud oyndap khi lajan baroh kawei ka Sor Shillong. Ha

kaba kyrsiew ia la ka ri u Myllung Soso Tham u ong : ' ..... , nga sngew ba ka ri kan dang khle khynraw da kumwei pat, lada ngi long kiba *amar*, kiba *shynrang* bad kiba *tbit* kum kiba rim, .. .... Tang da kumta lehse ha ki snem ba hadien ngin dang lah ban bat hi ia ka Meirilang jong ngi, kaba hyndai ki khot—

"Ka Ri Um Snam U Kfi U Kpa," (ia kaba mynta kynrei ki nongwei shisngi kiba thap nirong ban shu ioh ei lada ngi tamalah ban ai ri muid bad ban die ia ki khyndew ha ki) "U rngading barhem jong ka jingkyrmen un dang lah ban thang ia ka jingpangswai jong ka ri, lada ki nongrep bad ki trai khyndew ha baroh shitylup ka ri, kin ngam jylliew bad pyrkhat khi : mynsiem ia kine ki kyntien; bad kin bat skhem ruh triang ia la ki jong ki khyndew ki shyiap.

Ka jinglongtrai halor ka khyndew ka shyiap ka long ha ka kynthei, katba ka bor ban trei ban ktah bad ban rep ban riang pat ka shong ha u rangbah. Te kumta ngi iohi bad ngi shem kynrei ruh ba ki khun kynthei nongrep, kiba ioh lok da kibym dei nongrep, ki ienno ia la ki kper ki phrah, ki jaka ki putar bad ki leit bud ia la ki nongkamai sha ki jaka ba ki trei. Nangta pat, haba ki shem shitom lanot, lane wat haba ki u sngew-im bad sngewbit sngewbiang ha ki kam thymmai jong ki nongkamai jong ki, ki byndi lane ki die noh ia la ki nongtymmen nongsan hapdeng ka jingpangnud bajew mynsiem jong ki kur shynrang kiba shong ba sah ha la shnong la thaw.

Kumba ka long ha ki babun balang, katba u khun shynrang u dang shong ing baroh ka kamai jong u ka leit sha ka kmie; hynrei ha ka por ba u leit Ingbrew pat um lah ban rai kamai ei ei na la ingkmie. Namar ba um ioh bynta ei ei, te ka pynlong ia u ban ym da pynlut por bad bor than eh ha kaba trei ba ktah bad kamai kajih ha ingkmie. Haba kren kyllum, u shynrang Khasi u trei suk palat ha ki sngi ka jinglong samla, bad u pynsyrrwa ei

la la ka por ha ki tamasa bad ki jingsngewbha halaiphew jait. Kane ka rukom im ka ktah ia ka loh ka kot jeng ki kmie ki kpa, khamtam lei lei, lada kim da pynlut por bha ha kaba ai jingsneng jingkaw ia la ki khun rangbah. Kumta haba ka jingloh jingkot kam bit kam biang ki khun kynthei mih ing ki hap ban mih khlem da loh baiseng baidang ka babiang ban seng kam seng jam. Na kane, ngi ju iohi bun ki nongrep kiba dang shu mih ing ki hap ban trei kam lajong bad ka iabylla artat artat. Namar ba ki khun shynrang kim don hok ban rah ei ei sha inglok ; te kaba isynei ka long ia kito kiba trei bad kamai shitom ha ingkur, naba ki ruh ki hap hi ban bylla baiseng bad trei shitom ha ingkhun kumjuh kum kito kibym da trei smat eh ha ka por ba ki dang shong khyraw.

U nongrep uba shongkha ha la shnong la thaw ne ha ki shnong ba ka rukom trei rukom ktah ka dang ladei bad ka shnong lajong un da shitom than ; hynrei ka jingeh bajur ka long ia uto uba poi shongkha shajngai ha kaba ka rukom trei ka la pher. Kine ki rukom shem jingeh, ki la pynlong ia bun bun ki nongrep ban wanrah ia la ki khun ki tnga sha ki shnong lajong.

Kumta ba ka rep ka rlang kan roi kan pa, bad ki khun kin loh la ka seng ka dang ; hato kam bha mo ba ngin aiti noh ia ka kam ka jam ha u khun Shynrang, bad ba u khun un kamai kajih bad un shong un sah bad la ki kmie ki kpa ? Kata, u khun un shimti noh ia ka kam na la u kpa, ha ka jaka ban shim da u pyrsakurim kumba ka la ju long ha kane ka juk jong ngi mynta.



## KA JINGTHOH TAM (APPENDIX)

KA JINGROI PARUM PAREH KI KHUN U  
HYNÑIEW TREP.

Ki khun u Hynñiew-trep, kiba kynthup ia u Ki ynriam, U Pnar, U Bhoi bad U War bad ia kiba la ju tip kylleng ka pyrthoi da ka kyrteng *KHASI*, ki la shong la sah ha kine ki lum baltynnad kham slem ban ia kiwei pat ki jaitbynrlew ha kane ka thaiñ. Hynrei ha u Nailar jong ka snem 1976 la mih ha ki kotkhubor, ka jingthoh kaba ong ba ki *KHASI* kin sa duh jait noh shuwa ba kane ka spah snem ba mynta kan khyrdep la ka jingkhang bad kan klew tyngkong sha ka snem kaba 2000.

Naba ka shongkha shongman ka long ka tynral jingroi jong kano kano ka jaitbynrlew, kumta ngi shim lyngkot ia kaei ba ki parakher paramer ki dei ban pyndep. Ka por lapoikha polman kaba lah ban pynroi ia ka jait ka khong ka dei ka por samla, la kaba ngi lah ban bynta ha ki lai kyrdan : ka por khie samla, ka por samla bad ka por samla mellow.

Ka por khie Samla ka sdang naduh 14-15 snem ka rta bad ka kut ynda u briew u la dap 20 snem ei ei. Namar ba u kpa u long u nongbsa ne u nongkamai kajih, te kumta u samla shynrang u dei ban klar ralmaw raldieng na ka jingshimti la ka longkpa haba ka rta jong u ka dang long hapoh ki khatsnem; naba ha kane ka por ki shyleng ki dang lung, ki tyrpeng ki dang tlot, ka pyr-khat pyrdaiñ kam pat blang bad ka nongrim kam pat don. Namar ka jingkhia bad jingshitom ka lyngkor u kpa, te ngi shem kynrei bha la ki jingkylla lieng ka long-ing longsem haba ki shynrang ki shongkurim hapoh 20 snem ka rta. Kumta wat la ki rangbah ki lah eh ban pynroi la la ka jaitbynrlew ha kane ka por ruh, hynrei namar ba kim pat lah ban bsa khun ha ka rukom ka badel; ka wallam ia ka jingduk jingkyrduh ha ing ha sem bad kane pat ka lah ban poi sha ka lapra khiewja pynban.

Ka pór Samla ka long naduh 20 snem haduh 30 snem e ei. Ka rta jong u briew naduh 20 haduh 25 snem, ka long ka por bakordor tam na ka bynta ban pynkhreh bad ban sañdur ia ka longing longsem babit babiang. Ha kane ka por u Samla u dei ban iai imangi ban pynkhreh bad ban pynbit pynbiang ia lade ban long u rangbah u bakhlañ tyrpeng bad u babiang ia ka kamañ kajih ban kyrshan ia ki khun ki tnga. Don ki shnong ha nongkyndong, haba ki khun shynrang ki dang shong samla ki kmie ki kpa ki ju ai seng ban rep lyngkha nong-khyraw ha kin loh balkheng bañdang ynda ki la leit ingbriew.

Ka jingbiang por ia u samla briew ban shongkha shongman ka lapher kat kum ki rukom jingtrei. Ngi ai jingmut ia u rangsamla uba trei ki kam ba da ka bor met ban shongkha noh haba u la dap 22 snem haduh 29 snem, bad ia uto uba trei suk ne uba shongskul pat ka por ba la ih bha ban shongkurim ka long haba ka rta ka la pol sha ki 25 snem haduh 30 snem ei ei.

Namar ba ka jingbsa khun bsa kti jong kito kiba trei kam ba-eh, kum ka bylla, ka kitnong ne ka rep ka riang, ka long da ka bor met, kumta lada u briew uba trei ia kine ki jait kam u shongkha palat na ka 25 ne 26 snem ka rta ka por kan poi ba haba u kpa u la noh ka met bad ka bor ka sor ki khun pat ki dang donkam ban sha' bsa bad kim pat lah ban iakit lem ia ka khia ka shon jong u kpa. Halor kane ka mat u Rev. Iarington Kharkongor u ong ; ' Kan bna shibun ia u shynrang briew uba long tang u nongbylla-sngi ban shongkha noh ha lane ha shwa ka arphew san snem bad ym dei ban duna ia ka arphew sne n", 1, bad mynta ka snem 1978 pat ka Sorkar India ka la pynjari ia ka aiñ kaba adong ia u samla briew ban shongkha haba um pat dap 21 snem bad ia ka theisamla pat haba kam pat don 18 snem ka rta.

Namar ba ia u khun shongskul ki kmie ki kpa ki hap ban bsa bad ban pyndap pynbiang nadong shadong; naduh dang kha haduh ba un da loh kam, te kumta u

briew ba shongskul um dei ban jhan eh ka leit inglok; bad ka biang eh ia u ban leit ingbriew haba u la dap 25 snem haduh 30 ei ei. Lada u leit lok noh shuwa ia katei ka por, nalo ba um pat lah ai jingmyntoi ei ei ha ing ha sem ia lade ruh um pat lah ban pynbiang ia ki jingdonkam ba ka loigkpa ka dawa.

Lada ka por khie samla ka lap than ban ioh khun ioh kti, ka por samla met-iaw pat ka la dier eh ia u shynrang briew ban kiew sha ka kyrdan kpa. Lada u kpa u la tymmen bad ki khun ki dang rit ka jynjar kan long ia u kpa bad ka ing hi baroh kawei. Ia u briew bakhraw kamai kaji' ta kam da pher eh, hynrei u barit kamai te u dei la kumno kumno, ban pyndep noh ia la ka kamram shuwa ba ka samoi met-iaw kan poi.

Lada u shynrang u dei hok ban long u nongpyndap bam ia la ki khun ki tnga, te ka biang por eh ia ka thei-samla ban shimti ia ka kamram longkmie haba ka rta ka la long hapdong 18 bad 25 snem; bad la kumno kumno kam dei ban shong samla palat por.

Ha u Khasi hyndai, baroh kiba la wan longbriew sha ki pyrthei ki dei ban pyndep ia ka hukum ban pynroi parum pareh bad ban pyniar la u tnun u tyndal. Ki iu pynshur ia ki rangiaw bad ia ki thei iaw ba kin iawad iathud la la ki barit bad hateng hateng ki sneng pyntieng ryngkat bad ka biria da ki kyntien. "Da pyneh ho la ka daw ioh pui shah *pynryngk'ing thlong - pynryngkhang synrei*;" bad kine ki kyntien pat ki pynlong ia ki rang met-iaw bad ia ki thei-iaw ba kin iakhun dukhi ban ioh la ki khun ki kti.

Ki Jiwi kiba long ka jaitbynriew ka barit paid hynrei ka bastad, basatar bad kaba ka pyrthei baroh ka tip, ki long kiba bat pyrkhing bha la ka shongkna shongman tang bad la ki parakher paramer naduh ki por mynbarim jong U Abraham haduh kine ki snai mynta. Ki Khasi

ruh, dang ha ki por kham mynshuwa, ki ju sneng la la ki khun samla ba kin klar na ka lapolkha bad ki jalt bym pat ju ladei ka um ka ding. Ka basngewsih, ka basngewpangnud bad ka ba-lpangmet ia la ka jaitbynriew, ka long ba ha kine ki sngi jong ngi mynta, ki kongthel kim long shuh kum mynbarim, hynrei ki lasngewtynn timer bad lasngewphuhmut phuhmat ruh ban iadei-kha dei man bad ki jalt ki-bym ju ladei um iadei ding da ki spah snem mynshuwa ( lane da ki hajar snem pynban).

Namar ba ngi iadon tang kumba saw lak ngut ei ei, te kumta ba ki khun U Hynñiewtrep kin iaroi parum parah, ka long ka badei eh ba ki rangkhynraw bad ki thei-khyilud kane ka juk mynta kin ialongkha longman biang por tang bad la ki parakher paramer. Da kaba ngi leh kumne, ha ka jaka ba ka jaitbynriew jong ngi kan jah kyr-teng noh shuwa ka jingwan ka snem kaba 2000, kan roi pynban shishah ne arshah ryngkat bad ka khai pateng, ka khih ka khan bad ka trei ka ktah ba dap bablang bad balphuh iphieng.

- 
1. Ki Nuksa Ha Ka Jingim Ba Dei Ban Phiklr.
-

## **KI KOT DA UJUH U NONGTHOH :—**

- |   |    |                |
|---|----|----------------|
| 1. LA SHAIONG KI KHASI NGAIÑ                      | —  | <b>Rs.1.00</b> |
| 2. I. KHYLLIE PAT PARA-RI<br>IA LA KA KHAÏ PATENG | -- | <b>Rs.2.50</b> |

## **LAH BAN IOH NA :—**

- (A) U Bah Debin Kharsyntiew, Nongdie Kotkhubor  
Mawlai Wahumkhrah, Shillong-8.
- (B) The Shillong Co-Operative Marketing Society **Ltd.**,  
Barabazar, Shillong-2.
- (K) Shillong Stationery, Book Seller  
Lakañor Lodge, Mawkhar, Shillong - 2.



**"Ki jingshem jong u nongthoh ki biang ban pynpeit-mat ia ki khmat ba la byrie, ki biang ruh ban pynproh ia ki jableng ba la bthi, bad ki biang ruh ban pynkyndeh shadem ia ki Samla kiba thmu ban laid shaphrang ban pynriewspah ia la ka jaitbynriew ha ka liang ka spah ka phew, ka akor ka burom, ka tip-kur tip-kha, ka tip-hok tip-sot bad ka tipbriew tip Blei"—Dr. R.S. Lyngdoh.**

**"Nga don ka jingkyrmen ka bashynna bha-ba kane ka thup ka don ka khubor kaba kyrpang ia ka jaitbynriew jong ngi, ha kane ka pateng bynriew ba mynta; bad nangne nga ngelt kan kyrsiew ha kawel pat ka step ym shuh kaba shu shai byrngut, hynrei kaba phyrnai bha khrek"—B.C. Jyrwa.**

**"Nga hi nga ong ba ia kane ka jingthoh-tam ki Samla Shynrang bad Kynthei jong ngi ki del ban spel lyndet lut baroh khoit"**

**—Fr. S. Sngi Sten-Lyngdoh, S.D.B.,**

**"Hynrei mynta pat tyngkreiñ ngi iohi da la ki ki mat, ba ka khañ pateng ki khun ka ri ka don hapteng ka jingkhiedew bad jingapnyilung bad lynda ngi kyndit briew noh, ka lah ban kylla lieng noh syndon tang hapoh kane hi ka pateng."—Nongthoh.**

